


陝西通志



第六十一卷

人物七

忠節

DS
793
S4555
1735
V.61

陝西通志第六十一卷

人物七

忠節

周

富辰

郤人襄王大夫

鄭伐滑王使伯服游孫伯如鄭請滑鄭執二子王怒將

以狄伐鄭富辰諫王弗聽狄伐鄭取櫟王德狄人將以其女為后

辰諫王又弗聽王黜狄后狄人來誅殺譚伯辰曰昔吾驟諫王王

弗從以及此難若其不出王其以我為對乎乃以其屬死之

國語

子車奄息

秦大夫

交交黃鳥止於棘誰從穆公子車奄息交交黃鳥止

於桑誰從穆公子車仲行交交黃鳥止於楚誰從穆公子車鍼虎

詩秦風

秦穆公卒以子車氏之三子為殉皆秦之良也國人哀之為

之賦黃鳥

詩經注

穆公與群臣飲酒酣公曰生共此樂死共此哀於

是奄息仲行鍼虎許諾及公薨皆從死黃鳥之詩所爲作也

史記秦本

紀注

蘇武字少卿

建子杜陵人

天漢元年以中郎將持節送匈奴使留在漢者

與副中郎將張勝假吏常惠等俱至匈奴匈奴欲降之使衛律召

武受辭武引佩刀自刺律驚自抱持武氣絕半日復蘇律謂武曰

蘇君律前歸匈奴擁衆數萬蘇君今日降明日復然空以身膏草

野誰復知之武不應律曰君今不聽吾計後雖欲復見我尚可得

乎武罵曰女畔主背親何以女爲見律知武終不可脅白單于乃

幽武大窖中絕不飲食天雨雪武臥齧雪與旃毛并咽之數日不

死匈奴以爲神徙武北海無人處使牧羝武至海上廩食不至

掘野鼠去草實而食之伏漢節牧羊臥起操持節旄盡落久之單

于使李陵至海上置酒設樂謂武曰單于聞陵與子卿素厚故使來說足下虚心欲相待武曰武父子無功德皆爲陛下所成就今得殺身自效誠甘樂之願勿復再言陵數日復曰子卿一聽陵言武曰自分已死久矣王必欲降請畢今日之懽效死於前陵見其至誠喟然嘆曰嗟乎義士陵與衛律之罪上通於天因泣下沾巾與武決去後陵復至海上語武捕得雲中生口言吏民皆白服曰上崩武號哭嘔血旦夕臨數月昭帝即位匈奴與漢和親漢求武等匈奴詭言武死後漢使復至匈奴常惠教使者謂天子射上林苑得雁足有繫帛書言武等在其澤中單于驚謝漢使召會武官屬隨武還始元六年春至京師詔奉武一太牢謁武帝園廟拜爲典屬國武留匈奴凡十九歲始以強壯出及還鬚髮盡白宣帝神

爵二年病卒圖畫麒麟閣

漢書本傳

段崇字禮高南鄭人太守鄭厯命為主簿涼州羌入漢中從厯屯褒

中厯欲戰崇諫不可厯不聽出戰敗績崇及子勃兄子伯生等皆

死羌遂得厯殺之程信字伯義南鄭人時為功曹居守馳來赴難

殞殮厯喪結故吏子弟二十五人各募敢死士以待時太守鄧成

命為五官虜復來信等將其同志率先奮討大破之信被八創死

天子咨嗟賜信崇家穀數千斛有王宗原展及嚴孳李容姜濟陳

已曹廉勾矩劉旌九人皆以令義為鄭厯所命王宗原展與厯同

死孳容等七人與信并命詔書賜九子家穀各五百斛漢中士女志

曾旭謙子平陵人官太僕與王允共誅董卓李催入長安旭遇害後漢書曾恭傳

金元休名尚京兆人與同郡韋休甫第五休文俱著名號三休為兖

州刺史東之郡而太祖已臨兖州尚依袁術術僭號欲以尚為太

尉尚無屈意術亦不敢強也建安初尚逃還為術所害後喪至京

天子嘉尚忠烈爲之咨嗟詔百官吊祭拜子暉爲郎典畧

金禕字德禕璇子京兆人自以世爲漢臣觀漢祚將移與耿紀韋晃吉本

本子邈邈弟穆等結謀禕與王必善必典兵督許中事邈等率千

餘人夜攻必禕遣人爲內應射必中肩必投禕夜喚德禕禕家不

知是必謂爲邈等曰王長史已死乎必乃更他路奔南城會天明

邈等衆散故敗三輔決錄注

韋康字元將京兆人康父端從涼州徵爲太僕康代爲涼州刺史後

爲馬超所圍堅守歷時救軍不至遂爲超所殺三輔決錄

晉

傅祗字子莊泥陽人性至孝才識明練起家太子舍人遷滎陽太守

自魏黃初大水之後河濟汎溢祗造沉萊堰自此兗豫無水患遷

常侍左將軍楊駿輔政欲悅衆心議普進封爵祗與駿書曰未有

帝王始崩臣下論功者也不從氏人齊萬年反以祇爲行安西軍司加常侍討平之趙王倫輔政以爲中書監王戎陳準等相與言曰傅公在事吾屬無憂矣懷帝即位東海王越輔政祇既居端右明達國體朝廷制度多所經綜大將軍苟晞表請遷都使祇出詣沔陰脩理舟楫爲水行之備洛陽陷遂共建行臺推祇爲盟主傳檄四方徵義兵以暴疾薨祇自以義誠不終力疾手筆勅厲其二子宣暢辭旨深切覽者莫不感激慷慨

晉書傳元傳

魏浚東阿人寓居關中有幹用永嘉末與流民東保河陰之硤石時京邑荒饉浚掠穀麥獻懷帝及洛陽陷屯於洛北石梁塢撫養遺衆其附賊者解喻之恃遠不從命者遣將討之遠近感悅襁負至者甚衆劉琨承制假浚河南尹劉曜忌浚得衆率軍圍之浚夜走爲曜所得遂死之贈平西將軍浚族子該一名亥劉曜攻長安墮

浚赴難守金墉城曜引去餘衆依之元帝承制加冠軍將軍雍州
刺史助周訪討平杜曾詔以爲順陽太守王敦反梁州刺史甘卓
試以敦旨動之該距而不應蘇峻反率衆救臺軍峻未平卒

晉書
本傳

吉挹字祖冲蓮勺人祖朗愍帝時爲御史中丞西朝不守朗嘆曰吾
何忍君臣相隨北面事賊乎乃自殺挹少有志節孝武帝初苻堅
陷梁益桓豁表挹爲魏興太守尋加輕車將軍領晉昌太守以拒
堅功拜員外散騎侍郎苻堅將韋鍾攻魏興挹拒之斬七百餘級
加督五郡軍事鍾率衆欲趨襄陽挹邀擊斬五千餘級鍾怒回軍
圍之挹又屢挫其銳後賊衆繼至挹力不能抗賊城將陷挹引刀
欲自殺友人逼奪其刀會賊執之挹閉口不言不食而死追贈益

州刺史

晉書
本傳

傅弘之字仲度泥陽人父韶晉梁州史弘之少倜儻有大志舉秀才

不行義旗建輔國將軍道規以爲叅軍盧循作亂桓石綏自號荊
州刺史王天恩自號梁州刺史襲西城時韶爲梁州遣弘之討石
綏等斬之除太尉行叅軍高祖北伐弘之與扶風太守沈田子等
七軍自武關入僞上洛太守脫走進據藍田招懷戎晉晉人龐斌
之羌人康橫等各率部歸化進爲桂陽公除畧陽太守徐師高叛
弘之討平之高祖歸後勃勃僞太子赫連瓚率衆三萬襲長安弘
之領步騎五千於池陽破之瓚又抄掠渭南弘之又於寡婦渡破
瓚掠七千餘口義真東歸勃勃傾國追躡於青泥大戰弘之軍敗
陷沒逼令降不屈見殺時年四十二

宋書
本傳

梁

韋粲字長倩杜陵人好學仗氣太清二年爲散騎常侍粲聞侯景作
逆簡閱部下得精卒五千馬百疋倍道赴援至豫章奉命報云賊

橫江粲就內侍劉孝儀謀之孝儀曰必期如此當有別勅豈
及相驚動時孝儀置酒粲怒以杯抵地曰賊已渡江便逼宮闕
陸俱斷何暇有報假令無勅豈得自安韋粲今日何情飲酒即
馳馬出以輕舸就路至南洲司州刺史柳仲禮亦帥步騎萬餘人
至橫江粲即送糧伏贍給并散私金帛以賞其戰士建議推仲禮
爲大都督進軍次新亭是夜仲禮入粲營部分衆軍令粲頓青塘
粲帥所部水陸俱進時值昏霧軍人失道比及青塘夜已過半壘
柵至曉未合景率銳卒來攻軍副王長茂勸據柵待之粲不從令
軍主鄭逸逆擊之遂敗賊乘勝入營左右牽粲避賊粲不動叱子
弟力戰兵死畧盡遂見害子尼及三弟助警構從弟昂皆戰死賊
傳粲首以示城內太宗聞之流涕曰社稷所寄惟在韋公如何不
幸先死行陣詔贈護軍將軍世祖平侯景追諡曰忠貞並贈助警

構及尼皆中書郎昂員外散騎常侍榮長子臧字君理歷官東宮領直侯景至帥兵屯西華門城陷奔江州收舊部曲據豫章爲部

下所害

梁書本傳

北魏

王洛兒京兆人明元在東宮給事帳下性謹愿未嘗有過明元嘗獵於灋南乘冰而濟冰陷沒馬洛兒投水奉帝出殆將凍死帝解衣賜之恩寵日隆天賜末帝避難居外洛兒晨夜侍衛恭勤發於至誠元紹之逆帝晝居山嶺夜還洛兒家洛兒冒難往返京都通問大臣大臣遂出奉迎明元還宮社稷獲全洛兒有功焉太宗即位拜散騎常侍賜爵新息公卒贈太尉太宗親臨哀慟者數四子長

城襲爵

北史本傳

王干

石祖朔方人

世祖時虎賁幢將從征平涼有功賜爵安漢男遷給

討蠕蠕戰歿

魏書宿石傳

蘇湛字景儁魏侍中則之後舉秀才蕭寶夤之討關西以湛爲行臺
郎中深見委任孝昌中寶夤反時湛臥疾於家寶夤報湛云死生
榮辱與君共之湛聞之舉聲大哭曰爲我白齊王王本以窮鳥投
人賴朝廷假王羽翼不能竭忠報德乃欲乘人間隙有不滅之心
蘇湛不能以百口爲王族減願乞骸骨還鄉里寶夤素重之聽還
武功寶夤敗莊帝即位徵補尚書帝謂曰聞卿答寶夤甚有美辭
湛頓首謝曰臣與寶夤周旋契濶言得盡心而不能令其守節臣
之罪也莊帝大悅加散騎侍郎尋遷中書病還鄉里終於家

魏書本傳

韋元恢杜陵人有氣幹孝昌初值刺史元法僧外叛元恢招聚同志

潛規克復事泄爲法僧所害時人傷之

魏書韋元傳

泉企字思道上洛豐陽人曾祖景言魏建節將軍世襲本縣令父安

志復領本縣企九歲喪父哀毀類成人年十二鄉人詣州請企爲縣令魏宣武帝詔從所請企雖童幼而好學恬靜百姓安之孝昌初加龍驤將軍除上洛郡守蕭寶夤反遣其黨郭子恢襲據潼關企率鄉兵三千人拒之連戰數日子弟死者二十餘人遂大破子恢以功拜征虜將軍寶夤又遣兵萬人趨青泥圖取上洛豪族泉杜二姓密應之企與刺史董紹宗潛兵掩襲二姓散走寶夤亦退遷浙州刺史永安中梁將王元真寇荊州加企持節都督率衆援之遇於順陽與戰大破之除東雍州刺史企性清約纖毫不擾於民每於鄉里運米自給孝武初齊神武專政魏帝有西顧之心欲委企以山南之事乃除洛州刺史當州都督未幾帝西遷齊神武率衆至潼關企遣子元禮禦之上洛人泉岳其弟猛畧與拒陽人杜窋等謀翻洛州以應東軍企知之殺岳及猛畧等窋亡投東魏

大統初進爵上洛郡公三年高敖曹圍逼州城杜窋爲鄉導企拒守旬餘矢盡援絕城乃陷企謂敖曹曰泉企力屈志不服也及竇泰被擒敖曹遂執企而東以杜窋爲刺史企臨發密誡子元禮仲遵致力本朝餘無所言聞者莫不憤歎尋卒於鄴元禮少有志氣好弓馬釋褐奉朝請本州別駕累遷散騎常侍洛州陷與企俱被執而東於路逃歸時杜窋雖爲刺史然邑人素輕杜而重泉及元禮至與仲遵相見感父臨別之言潛與豪右結託信宿之間遂率鄉人襲州城斬窋傳首長安朝廷嘉之拜車騎大將軍世襲洛州刺史從戰沙苑爲流矢所中卒仲遵少謹實涉獵經史年十四爲本縣令及長有武藝每從父兄征討以勇決聞高敖曹攻洛州企令仲遵出戰衆寡不敵爲流矢中目不堪復戰及城陷仲遵以被傷不行後與元禮斬窋以功封豐陽伯加授征東將軍豫州刺史

及元禮於沙苑戰歿復以仲遵爲洛州刺史隨于謹攻柏谷塢力戰先登擒其將王顯明復會大軍戰於邙山授荊州刺史仲遵雖出自巴夷而有方雅之操歷官以清白見稱朝廷以其父臨危抗節令襲爵上洛郡公恭帝初徵拜左衛將軍尋出爲金州刺史武成初卒諡曰莊

周書泉
企傳

韋祐字法保山北人祖駢中書博士父義上洛郡守法保少好遊俠人有急難投之者多保存之父歿事母兄以孝敬聞慕李長壽之爲人遂娶長壽女因寓居關南正光末拜員外散騎侍郎孝武西遷除右將軍及長壽被害其子延孫收餘衆守禦東境朝廷恐延孫兵少不能自固乃除法保東洛州刺史配兵數百人以援延孫法保遂倍道兼行東魏陝州刺史劉貴以步騎邀之法保命所部爲圓陣且戰且前數日得與延孫兵接乃并勢置柵於伏流未幾

太祖徵法保與延孫還朝賞勞甚厚授大都督除河南尹頻與敵人交兵每身先士卒單馬陷陣嘗至關南與東魏人戰流矢中頸從口中出當時氣絕輿至營久之乃蘇拜車騎大將軍鎮九曲城加驃騎大將軍會東魏遣軍送糧饋宜陽法保潛邀之轉戰數十里兵少不敵爲流矢所中卒諡曰壯

周書本傳

北周

楊敷字文衍華山公寬之兄子父暄歷輔國將軍諫議大夫以別將從魏廣陽王深征葛榮爲榮所害贈華州刺史敷少有志操重然諾每覽書傳見忠臣烈士之事常慨然景慕之魏建義初襲祖鈞爵臨貞縣伯天和六年出爲汾州刺史齊將段孝先率衆五萬來寇梯衝地道晝夜攻城敷親當矢石隨事扞禦拒守累旬攻之愈急時城中兵不滿二千戰死者已十四五糧儲又盡公私窮蹙齊

公憲總兵赴救憚孝先不敢進軍數知陷沒乃召其衆謂之曰吾等糧絕今欲突圍出戰死生一決於諸君意何如衆咸涕泣從命乃率兵夜出擊殺齊軍數十人俄而孝先率諸軍盡銳圍之數殊死戰矢盡爲孝先所擒齊人方欲任用之數不爲屈遂卒於鄴高祖平齊贈使持節大將軍諡曰忠壯

周書本傳

韓盛字文熾南陽堵陽人五世祖遠爲鄭縣令因徙居京兆之渭南幼有操行涉獵經史兼善騎射膂力過人大統初起家開府行參軍從李遠積年征討每有戰功累遷至大都督出爲新平郡守居守清靜嚴而不殘矜恤孤貧抑挫豪右賊盜止息郡治肅然尋以本官從晉公護東討於洛陽戰歿贈浙洛義三州刺史諡曰壯子謙嗣官至大都督兄德輿歷官邵州刺史仲恭歷廣原靈原新豐三縣令所在皆有聲績有八子並有志操少子紉約後最知名

周書

楊授
傳

韋總字善會

孝寬子
杜陵人

聰敏好學位京兆尹帝嘗戲總曰卿師尹帝鄉

故當不以富貴威福鄉里耶總正色對曰陛下擢臣非分竊謂已

鑒愚誠今奉嚴旨便似未照丹赤豈可久忝此職用疑聖慮請解

印綬以避賢能帝大笑曰前言戲之耳五年從武帝東征每率麾

下先驅陷敵遂於并州戰歿贈上大將軍追封河南郡公謚曰貞

北史韋

孝寬傳

趙世模初事高寶寧後以衆歸周授上開府寓居京兆之雲陽高祖

踐祚恒典宿衛迨同晉王伐陳先鋒遇賊力戰而死朝廷以身死

王事令子元淑襲本官

隋書趙
元淑傳

張定和字處謚萬年人少貧賤有志節初爲侍官從上柱國李克擊

突厥先登陷陣虜刺之中頸定和以草塞瘡而戰神氣自若虜遂敗走上聞而壯之進位柱國封武安縣侯煬帝嗣位拜宜州刺史尋轉河內太守頗有惠政歲餘從帝征吐谷渾定和挺身登山賊伏兵於巖谷之下發矢中之而斃諡曰壯武子世立嗣尋拜爲光

祿大夫

隋書本傳

韋洸字世穆

世康兄杜陵人

性剛毅有氣幹少便弓馬隋文帝爲丞相從季

父孝寬擊尉遲迥於相州以功拜柱國進襄陽郡公時突厥寇邊令洸統兵出原州擊破之拜江陵總管陳平拜江州總管畧定九江遂圖嶺南上與書慰勉之洸至廣州嶺表皆降上聞而大悅許以便宜從事拜廣州總管歲餘番禺夷王仲宣反以兵圍洸洸拒之中流矢卒贈上柱國諡曰敬子協字欽仁好學有雅量位秘書郎其父在廣州上命協齋詔勞問未至而父卒上以其父死王事

拜柱國歷定息秦三州刺史有能名

北史韋世康傳

韋福獎

世康少子杜陵人

通事舍人在東都與楊元感戰沒

北史韋世康傳

楊武通華陰人性果烈善馳射數以行軍總管討西南夷以功拜左

武衛將軍歷岷蘭二州總管復與周法尚討叛獠法尚軍不利武

通束馬懸車出賊不意頻戰破之賊知其孤軍無援傾部落而至

武通轉鬪數百里為賊所拒四面路絕武通輕騎挑戰墜馬為賊

所執殺而噉之

北史劉方傳

陶模京兆人性明敏有器幹仁壽初為嵐州司馬諒既作亂刺史喬

鍾葵發兵將赴逆模拒之曰漢王所圖不軌公荷國厚恩致位方

伯謂當竭誠效命以答慈造豈有大行皇帝梓宮未掩翻為厲階

鍾葵失色曰司馬反邪臨之以兵詞氣不撓鍾葵義而釋之軍吏

進曰若不斬模何以壓眾心於是囚之於獄及諒平煬帝嘉之拜

開府授大興令楊元感反率兵從衛元擊之以功進位銀青光祿

大夫卒官

隋書本傳

劉韶

文靜父武功人

仕隋戰死贈上儀同三司

唐書劉文靜傳

楊善會字敬仁華陰人大業中爲郿令以清正聞俄而山東饑饉百姓相聚爲盜善會以左右數百人逐捕之往皆克捷其後賊帥張金稱屠城剽邑善會率所領與賊捕戰數挫其鋒於時郡縣微弱陷沒相繼能抗賊者惟善會而已金稱將數百人招集餘黨善會追捕斬之進拜清河通守其年從楊義臣斬漳南賊帥高士達士達部將竇建德復擾清河善會逆拒之爲賊所執建德禮之用爲貝州刺史善會罵之曰老賊何敢擬議國士我豈屠酤兒輩敢欲更相吏邪於是害之

隋書本傳

張季珣京兆人父祥少爲高祖所知開皇中累遷并州司馬仁壽末

漢王諒舉兵反遣其將劉建畧地燕趙至井陘祥勒兵拒守建攻之復縱火燒其郭下百姓驚駭其城側有西王母廟祥登城望之再拜號泣而言曰百姓何罪致此焚燒神其有靈可降雨相救須臾驟雨其火遂滅士卒感其至誠莫不用命月餘援軍至賊遂退走以功授開府入爲都水監卒官季珣少慷慨有志節大業末爲鷹揚郎將其府據箕山爲固與洛口連接及李密陷倉城遣人呼之季珣罵密極口密怒遣兵攻之連年不克時密衆數十萬季珣四面阻絕而執志彌固誓以必死經三年糧盡士卒羸病不能拒戰遂爲所陷季珣坐聽事顏色自若群賊曳季珣殺之時年二十八其弟仲琰大業末爲上洛令及義兵起率吏人城守部下殺之以歸義仲琰弟琮爲千牛左右宇文化及之亂遇害季珣家素忠烈兄弟俱死國難論者賢之

隋書本傳

沈光字總持吳興人父君道仕陳陳滅家於長安光少驍捷善戲馬
常募立功名不拘小節大業中徵天下驍果之士光預焉同類皆
出其下及帝攻遼東以衝梯擊城竿長十五丈光升其端臨城與
賊戰賊競擊而墜適竿有垂絙光接而復上帝壯之即日拜朝請
大夫江都之難潛構義勇為帝復讐光身無介冑遂為所害壯士
聞之莫不隕涕

隋書
本傳

唐宗

休璟祖京兆始平人

隋大業末為朔方郡丞梁師都舉兵將據城宗抗節

不從為所害

舊唐書唐
休璟傳

王辯字警畧蒲城人少習兵書尤善騎射漢王諒作亂從楊素討平
之賜爵武寧縣男遼東之役以功加通議大夫山東賊帥等寇掠
河北辯進兵擊之所往皆捷深為群賊所憚翟讓寇徐豫辯頻擊
走讓與李密屯據洛口倉辯與王世充討密阻洛水相持經年辯

率諸將攻敗密因薄其營戰破外柵密諸營已有潰者乘勝將入城世充不知鳴角收兵翻爲密徒所乘官軍大潰不可救止辯至洛水橋已壞竟溺死焉

隋書本傳

骨儀京兆長安人性剛鯁有不可奪之志開皇初爲侍御史處法平當不爲勢利所回煬帝嗣位遷尚書右司郎時朝政漸亂濁貨公行儀勵志守常介然獨立超拜京兆郡丞公方彌著時刑部尚書衛元兼領京兆內史頗行詭道輒爲儀所執正元不能傷也義兵至元恐禍及遂稱老病儀與陰世師同心叶契父子並誅

隋書本傳

唐

劉感岐州鳳泉人武德初以驃騎將軍戍涇州爲薛仁果所圍糧盡殺所乘馬啖士而煮骨自飲至和木屑以食城垂陷長平王叔良救之乃解與叔良出戰爲賊執還圍涇州令感約城中降感給諾

至城下大呼曰賊大饑亡在朝暮秦王數十萬衆且至勉之無苦
仁杲怒執感埋其半土中馳射之至死罵益甚賊平高祖購得其

尸祭以少牢贈瀛州刺史諡忠壯詔其子嗣封爵賜田宅焉唐書本傳

楊大寶炎曾祖天興人爲龍門令劉武周攻之死於守贈全節侯唐書楊炎傳

靳孝謨武功人爲金紫光祿大夫武德二年正月遣孝謨安集邊郡

爲梁師都所獲孝謨罵之極口師都殺之二月詔追賜爵武功縣

公諡曰忠通鑑

盧士儼劉黑闥之亂死事者又有盧士儼李元通士儼客韓城隋亂

結納英豪高祖與之舊及兵興率數百人上謁汾陰又使兄子諭

降劇賊孫華與劉弘基敗隋將桑顯和於飲馬泉擢瀛州刺史黑

闥遣輕騎破其郛拒戰半日儼爲賊禽欲使說下城堡不從見殺

元通藍田人高祖入關率所部自歸拜定州總管爲黑闥所破愛

其才欲以爲將元通曰吾當守節以報烏能降志耶不聽囚之故
吏有餉欲餽者元通曰諸君見哀吾能一醉遂縱飲謂守者曰吾
能劍舞可借刀守士與之曲終仰天太息曰大丈夫撫方面不能
保所守尚何惕息耶乃潰腹死帝爲流涕擢其子伏護大將軍

忠義
傳

唐書

安金藏長安人在太常工籍睿宗爲皇嗣有誣皇嗣異謀者武后詔
來俊臣問狀左右欲引服金藏大呼曰公不信我言請剖心以明
皇嗣不反引佩刀自刺腹中腸出被地眩而仆武后聞大驚輿致
禁中命高醫內腸褫桑柘紖之閱夕而蘇后臨視嘆曰吾有子不
能自明不如爾之忠也即詔停獄睿宗乃安神龍初母喪葬南闕
口營石墳晝夜弗息地本印燥泉忽湧流廬之側李冬有花犬虎
相擾本道使盧懷慎上其事詔表闕於問擢右驍衛將軍卒諡曰

忠以子承恩爲廬州長史中和中擢其遠孫敬則爲太子右諭德

唐書
本傳

韋安石萬年人祖津陵州刺史父琬成州刺史安石舉明經蘇良嗣薦於武后擢膳部員外郎遷并州司馬有善政安石性方重不苟言笑政尚清嚴吏民尊畏久視中遷文昌右丞時二張及武三思寵橫安石數折辱之易之引蜀商博塞后前安石奏商等賤類不當戲殿上顧左右引出坐皆失色后以安石辭正改容慰勉后幸興泰宮議趨疾道安石曰千金子且誠垂堂况萬乘可乘危哉后爲回輦睿宗立復爲侍中中書令太平公主有異謀欲引安石數邀之拒不往帝一日召安石曰朝廷傾心東宮卿胡不察曰太子仁孝天下所稱且有大功陛下今安得亡國語此必太平公主計也帝矍然曰卿勿言朕知之主竊聞乃構飛變欲訊之賴郭元振

保護免俄罷政事遷蒲州刺史太常卿姜皎有所請拒之皎奏安石護作定陵有盜沒詔籍其贓安石乃發憤卒天寶初贈左僕射
郇國公諡文貞二子陟斌陟字殷卿累遷吏部侍郎楊國忠忌其才貶桂嶺尉徙平樂肅宗即位永王兵起委陟招諭授江東節度使與高適來瑒會安州推瑒爲地主爲載書登壇辭旨慷慨士皆隕泣永王敗除御史大夫拜吏部尚書卒諡忠孝斌父爲相時授太子通事舍人嚴峭有大臣體天寶中爲中書舍人祿山陷洛陽斌爲賊得憂憤卒贈秘書監

唐書本傳

王孝傑新豐人少以軍功進長壽元年爲武威道總管克龜茲于闐疏勒碎葉等城武后曰貞觀中西境在四鎮其後不善守棄之吐蕃今故土盡復孝傑功也進鳳閣鸞臺三品契丹李盡忠等叛詔爲靖邊總管將兵討之軍至東破石谷與賊戰後軍不至爲虜所

乘軍潰孝傑墮谷死贈耿國公以其子無擇為朝散大夫

唐書本傳

高叡萬年人舉明經歷趙州刺史聖曆初突厥默啜入寇叡嬰城拒

虜攻益急長史唐波若度且陷即與虜通叡覺之力不能制即自

經不得死為虜執使降諭諸縣不肯應見殺初虜至有為叡計者突

厥蠡銳所向無完公不能抗且當下之答曰我刺史不戰而降罪

大矣武后嘆息贈冬官尚書諡曰節詔誅波若籍其家下制褒叡

忠節波若臣賊使天下知之子仲舒通故訓學擢明經開元初宋

璟蘇頲當秉多咨訪焉時舍人崔琳練達政宜璟等禮異之語人

曰古事問高仲舒時事問崔琳何復疑終太子右庶子

唐書本傳

王海賓

忠嗣父華州鄭人

官太子右衛率豐安軍使開元二年吐蕃寇隴右

詔隴右防禦使薛訥率杜賓客郭知運王晙安思順禦之以海賓

為先鋒戰武階追北至壕口殺其眾進戰長城堡諸將燭其功

兵顧望海賓戰死大軍乘之斬賊萬七千級獲馬七萬牛羊十四

萬元宗憐其忠贈左金吾大將軍

唐書王忠嗣傳

賈循京兆華原人蘇頲嘗謂今頗牧爲益州表署列將敗吐蕃於西山三遷靜塞軍營田使母亡將葬宅有枯桑一夕再生芝出北壩人以爲瑞元宗以循有功詔贈其父常山太守祿山反使循守幽州故杲卿招之以傾賊巢穴循許可爲向潤客等發其謀賊縊之建中二年贈太尉諡曰忠從子隱林爲永平兵馬使當入衛屬朱泚難率衆扈行在德宗見隱林偉其貌問家世答曰故范陽節度副使循臣從父也帝異之令糾察行在遷檢校右散騎常侍封武威郡王賊圍急隱林冒矢石死戰已而圍解群臣稱慶卒贈尚書

左僕射

唐書本傳

顏杲卿字昕與真卿同五世祖父元孫爲濠州刺史杲卿以蔭調遂

州司法參軍與兄春卿弟曜卿並以書判超等遷范陽參軍安祿山聞其名表爲假常山太守祿山反吳卿及長史袁履謙謁於道賜杲卿紫袍履謙緋袍杲卿指所賜衣謂履謙曰與公何爲著此履謙悟乃與眞定令賈深內邱令張通幽定謀圖賊使子泉明往返計議時眞卿在平原陰養死士爲拒守計遣甥盧遜至常山約起兵斷賊北道杲卿大喜以爲兵犄角可挫賊西鋒元宗拜杲卿衛尉卿兼御史中丞履謙常山太守即傳檄河北言王師二十萬入土門遣郭仲邕引百騎爲先鋒馳而南於是趙鉅鹿廣平河間並斬僞刺史傳首常山杲卿兄弟兵大振祿山聞兵興大懼使史思明等率兵攻常山兵少未及爲守計六日而陷與履謙同執賊脅使降不應取少子季明刃頸上曰降我當活爾子杲卿不答遂並盧遜殺之杲卿至洛陽祿山怒曰吾擢爾太守何所負而反

卿瞋目罵曰汝牧羊羯奴耳天子負汝何事而反我唐臣守忠義恨不斬爾以謝上祿山不勝忿節解以肉噉之詈不絕賊鉤斷其舌曰復能詈否杲卿含胡而絕履謙斷手足賊轡之杲卿宗子近屬皆被害乾元初贈太子太保謚忠節建中中又贈司徒泉明購尸葬長安鳳栖原泉明有孝節常山陷客壽陽真卿爲蒲州刺史令泉明到河北求宗屬始一女及姑女並流離賊中及是并得之悉錢贖姑女還取賞復往則己女復失之履謙及父故將妻子尚三百餘人不能自存泉明悉力贍給殯父與履謙分柩護還長安履謙妻疑斂具儉狹發視之與杲卿等乃號踊待泉明如父肅宗拜泉明鄆令政化清明遷潮州司馬居官廉飭鬻不給居母喪哀毀骨立當世以爲難春卿倜儻通當世務舉明經終偃師丞沈盈者亦杲卿甥有行義釋褐博野尉與杲卿同死難

唐書本傳

龐堅涇陽人歷潁川太守安祿山反南陽節度使魯炅表堅爲長史兼防禦副使以薛愿爲潁川太守共守潁川賊將阿史那承慶悉銳攻之愿堅晝夜戰諸郡兵無援者自正月盡十一月賊設木鵲衝車飛梯薄城矢如雨士皆雷譟夜半踰城入二人不肯降賊縛致東京將磔解之有說祿山者曰義士也彼爲其主殺之不祥乃縛於樹比且死見者哭之

唐書本傳

蘇震

誥子武功人

以蔭補千牛累遷殿中侍御史祿山陷京師震棄家出

奔會肅宗興師靈武震晝夜馳及行在帝嘉之拜御史中丞終太

常卿

唐書蘇瓌傳

韓浩

休子長安人

萬年主簿弟洪爲華州刺史洪弟渾大理司直安祿山

盜京師皆陷賊賊逼以官將走行在浩洪渾及洪四子復爲賊擒殺之洪善與人交有節義籍甚於時見者爲流涕肅宗以臣子

死難詔贈浩吏部郎中洪太常卿渾太常少卿

唐書郭休傳

郭盱

子儀子鄭人

賊安守忠壁永豐倉子儀遣子盱與戰多殺至萬級盱

死於陳盱弟晞善騎射復兩京戰最力累進鴻臚卿吐蕃回紇入

寇加御史中丞援邠州擊虜破之居父喪值朱泚亂南走山谷賊

昇致之欲汙以官陽瘖不答賊脅之不動數以城中事貽書李晟

既而奔奉天天子還改太子賓客封趙國公晞弟曙累官司農卿

德宗幸奉天曙方獵苑北聞蹕至從乘輿入駱谷與功臣子李昇

韋清令狐建李彥輔被甲請見言南行路險且虞姦變臣等相誓

願更挾帝馬許之帝還擢金吾大將軍終祁國公

唐書郭子儀傳

李嗣業高陵人開元中從安西都護來曜討十姓蘇祿累功署昭武

校尉後安西軍中初用陌刀而嗣業尤善所嚮摧北高仙芝討勃

律署嗣業爲陌刀將時吐蕃兵十萬據山瀕水以扼王師嗣業提

步卒升山頽石四面擊賊虜大潰鼓而驅至勃律禽其主授右武衛將軍從平石國以跳盪先鋒加特進諸胡連兵攻四鎮仙芝爲大食所敗嗣業馳守白石嶺會拔汗那還兵塞道嗣業手挺麈擊人馬斃仆者數十百虜駭走仙芝乃得還進右金吾大將軍疏勒鎮使安祿山反肅宗詔至即引道廣平王收長安嗣業統前軍賊酋李歸仁擁精騎薄戰王師亂不能陣嗣業袒持長刀殺數十人陣復整步卒以陌刀長柯斧塔進所向無前斬首六萬級遂平長安進收東都封號國公兼北庭節度使與子儀等圍相州師耄諸將無功獨嗣業披堅數奮爲諸軍冠中流矢臥帳中方愈忽聞金鼓知與賊戰大呼創潰流血數升而卒諡曰忠勇嗣業忠毅憂國不計居產前後賞賜皆以助軍

唐書本傳

千里萬年人長七尺魁岸有力應募磧西累官安西副都護天寶

末安祿山反詔募兵河東即拜節度副使雲中太守遷上黨長史至德二載賊將蔡希德圍上黨千里恃勇開門率百騎欲直擒希德幾得而救至乃退會橋壞馬顛爲賊執仰首勅諸騎使還曰爲我報諸將可失帥不可失城軍中皆爲泣下賊還囚千里至東都

唐書

本傳

郭昕子儀母弟幼明子肅宗末爲四鎮留後會吐蕃陷關隴昕率將士閉境拒守北庭去西安七千餘里數遣使奉表皆不達聲問絕者十七年代宗朝昕密遣間使自回紇中來

華州志

令狐彰富平人父湏天寶中尉范陽彰遂少長范陽倜儻有膽氣涉獵書傳知大義事安祿山史思明僞署博滑州刺史鎮滑臺彰感激忠義思立名節乃潛謀歸順募勇士善水者乘夜涉河表請以所管賊一將兵馬及州縣歸順肅宗大悅賜書慰勞時彰移鎮杏

園渡遂爲思明所疑遣所親薛岌圍攻之彰明示三軍曉以逆順衆心感附與賊戰大破之遂以麾下入朝肅宗深獎之禮甚優厚拜御史中丞兼滑州刺史鎮滑州在職數年田疇大闢庫藏充積歲奉王稅及脩貢獻未嘗暫闕時吐蕃犯邊徵兵防秋彰遣屬吏部統營伍自滑至京師率自齎糧所過供擬皆讓不受識者稱之子建大曆四年入朝特加兼御史中丞歸滑州彰卒三軍逼奪情建守死不從舉家歸京師轉右龍虎軍使德宗出幸奉天建方教射軍中遂以四百人隨駕爲後殿加檢校左散騎常侍

舊唐書本傳

馮河清京兆人始隸郭子儀軍以戰多拜左衛大將軍後從涇原節度馬璘充兵馬使數以偏師與吐蕃遇多効級名聞軍中建中時姚令言討關東以河清知留後行師過關有急變德宗走奉天河清召諸將計事東向哭相勵以忠衆無異言即發儲鎧完仗百餘

乘獻行在披堅勒兵軍聲大振拜河清涇原節度使安定郡王朱
泚數遣謀人誅之河清輒斬以徇興元元年田希鑒害河清京師
平贈河清尚書左僕射再贈太子少傅

唐書本傳

辛讜

雲京孫
京兆人

初事李嶧性廉勁居揚州慨然常有濟時意龐勛反改

杜悆於泗州讜聞之挈舟趨泗口貫賊柵以入悆素聞其名握手
曰吾僚李延樞常爲吾道夫子爲人何意臨教吾無憂矣賊將李
圓焚淮口讜曰事棘矣獨出可以求援乃夜踰淮馳至洪澤見戍
將郭厚本告急大將袁公昇等曰賊衆我寡不可往讜拔劍瞋目
呼曰泗州陷在旦夕吾今斷左臂殺君去推劍直前厚本持之公
昇僅免厚本決許付兵五百讜徧問士曰能行乎皆曰諾讜泣以
謝衆擊賊大敗人心遂固圍三月救兵敗城益危讜復請乞兵與
壯士持斧直斬賊柵出見節度使令狐綯復詣浙西見杜審權合

兵五千路梗不得進讜引兵決戰斬賊六百級乃克入惛迎泣表

其功於朝授監察御史圍凡十月乃解初讜求救過家十餘未嘗

見妻子後以功第一拜亳州刺史乾符末終嶺南節度使

唐書本傳

杜惛

宗弟杜陵人

咸通中爲泗州刺史會龐勛反圍城處士辛讜勸惛出

家屬獨以身守惛曰吾出百口求生衆心搖矣不如與將士死生

共之衆聞皆泣下惛完濬城隍閱器械無不具賊將李圓易惛馳

勇士百人欲入封府庫惛爲好言厚禮迎勞賊不虞惛之謀明日

伏甲士三百宴毬場賊皆殲焉圓怒傳城戰惛殺數百人圓退未

幾賊焚淮口晝夜戰不息惛使人間道走京師詔戴可師以沙陀

吐谷兵二萬招討淮南節度使令狐綯遣牙將李湘屯淮口爲圓

所敗湘等並沒於是援絕賊乃以鐵鎖絕淮流梯衝乘城懿宗遣

人加惛檢校右散騎常侍勉以堅守勛遣圓入城見惛約降惛怒

殺之勛累攻不得志會招討使馬舉率兵至遂解去圍凡十月惛拊循士卒皆殊死戰卒完一州時稱為難賊平遷義成軍節度使

檢校兵部尚書卒

唐書杜佑傳

杜讓能字群懿

審權子杜陵人

擢進士第為集賢校理稍進兵部員外郎僖

宗狩蜀奔謁行在三遷中書舍人為翰林學士方兵興調發綏徠讓能處事機無所遺筭帝倚重之從還京師再遷兵部尚書李克用兵至帝夜出讓能徒步從之朱玫兵逼帝狩梁是時棧道為南山石君涉所毀間關險澁讓能未嘗去側帝次褒中擢兵部侍郎同平章事於時貢賦不輸行在衛兵往往乏食讓能遣使入河中諭王重榮榮果奉詔京師平進中書侍郎昭宗立累進太尉李茂貞守鳳翔恃有功不奉法帝詔茂貞領興元武定以徐彥若為鳳翔節度使茂貞不赴鎮帝怒詔讓能計議曰卿為我圖之朕自以

兵屬諸王讓能泣曰陛下之心憲祖心也但時有所未便他日臣蒙晁錯之誅顧不足弭七國患然敢不奉詔景德二年以嗣覃王爲詔討使率師送彥若赴鎮茂貞迎戰蓋屋覃王敗讓能曰臣固豫言之請歸死以紓難乃賜死弟彥林御史中丞弘徽戶部侍郎皆及誅帝痛之後贈太師子光又次子曉不復仕

唐書杜如晦傳

韋昭度字正紀京兆人擢進士第踐歷華近累遷中書舍人僖宗西狩進同平章事還京授司空再狩南山還次鳳翔李昌符亂昭度質家族於禁軍誓共討賊士感動乃平昌符昭宗即位封岐國公進太傅王行瑜求爲尚書令昭度建言太宗由是即位後人臣無復拜者郭子儀有大功嘗授之因辭免况行瑜乎乃更號尚父行瑜怨請貶之未及報而行瑜收昭度於都亭殺之後追贈大尉

王琮字禮用高陵人休烈曾孫擢第授左拾遺咸通八年同平章事
拜尚書右僕射黃巢陷京師以病臥家巢欲起爲相琮辭疾賊迫
脅不止乃曰吾死在旦夕位宰相義不受污賊遂害之

唐書于琮傳

王徽字昭文京兆人第進士廣明元年爲戶部侍郎同平章事是日
黃巢入關僖宗西狩徽追帝不及爲賊所執將汙以官徽陽瘖不
答以刃環脅卒不動久之守者懈乃奔河中裂縑書章遣人間走
蜀詔拜兵部尚書京城四面宣慰催陣使更爲租庸供軍使因請
赦沙陀罪令赴難其夏沙陀會諸軍遂平京師遷右僕射大亂之
後宮觀焚殘園陵發掘徽充京畿安撫制置脩奉使外調兵食內
撫流亡踰年稍稍完聚即奉表請帝東還進檢校司空御史大夫
仍權京兆尹宦要家爭遣人治第侵冒齊民訟訴滿前徽一平以
法由是爲左右所憎遂移疾免昭宗立授吏部尚書大順元年卒

贈司空諡曰貞

唐書本傳

韓杲華州鄭人爲曲陽主簿及寇攻城陷歿焉

宋史韓杲傳

蔣偕字齊賢華州鄭縣人幼貧有立志父病嘗刲股以療父愈詰之

偕曰情之所感實不自知也舉進士爲大理寺詳斷官密州豪人

王澥使奴殺一家四人偕當澥及奴皆大辟宰相陳堯佐欲寬澥

持之不從偕以是知名歷知汾涇二州徙原州邊民苦屬戶爲鈔

盜偕得數輩腰斬境上盜爲息珠明康奴諸族數爲寇偕潛兵伺

之斬首四百徙華州鈐轄湖南蠻唐和內寇徙潭州賊平知忻州

高智儂反除韶州團練使廣南東西路鈐轄軍次賀州太平場賊

夜入營襲殺之贈武信軍節度觀察留後

宋史本傳

懷忠保安軍人官內殿崇班閤門祇候元昊叛厚以金幣及王官

招之懷忠毀印斬使洎入寇力戰以死

宋史本傳

高永能字君舉綏州人少有勇力善騎射由行伍補殿侍稍遷供奉官种諤取綏州發永能兵六千先驅入羅兀五戰皆捷治綏德城闢地四千頃增戶千三百即知城事元豐初為鄜延都監秋大稔夏人屯一千騎於大會坪將取稼永能簡精騎突過其營騎卒驚潰獲鈴轄二人轉六宅使夏人患之令曰有得高六宅者賞金等其身四年西討永能為前鋒鏖戰於無定河斬首數千級得馬三千橐駝牛羊萬計進東上閣門使永樂之役獻謀皆不用城既陷其孫昌裔欲拔之從間道出永能歎曰此吾死所也易一卒敝衣戰而死其子世亮與昌裔求得尸以歸邊人無不痛惜詔贈房州觀察使永能之亡延州將皇城使寇偉亦力戰而沒贈均州防禦

使

宋史本傳

張確字子固邠州宜祿人元祐中擢進士第徽宗即位應詔上書言
十事乞誅大奸退小人進賢能開禁錮起老成擢忠鯁息邊事修
文德廣言路容直諫宣和二年知坊汾二州七年徙隆德府明年
二月金兵至知城中無備諭使降確乘城拒守力戰而死欽宗聞
之悲悼贈述古殿直學士

宋史本傳

种朴

世衡孫長安人

知河州蕃部叛朴出討時朴至州才二日以賊鋒方銳

且盛寒欲姑待之而胡宗回馳檄至六七不得已遂出兵羌知朴
來伏以待朴遇伏首尾不相應朴殊死戰為賊所殺以馬負其屍
去事聞贈朴防禦使

宋史本傳

李翼麟州新秦人宣和末為代州西路都巡檢使屯崞縣金人取代

執守將嗣本遣諭降翼射却之帥士卒堅守義勝軍統領崔忠殺

都監張洪輔夜引金兵入城翼挺身搏戰達旦力不敵被執酋粘

罕欲臣之怒罵不屈死之

宋史本傳

朱昭字彥明府谷人宣和末爲振武城兵馬監押攝知城事金兵內侵夏人乘虛攻之城壞不可復支昭退召諸校謂曰城且破妻子不可爲賊污幸先戕我家而背城死戰勝則東向圖大功不勝則暴骨境內大丈夫一生之事畢矣衆未應昭幼子戲堦下遽起手刃之長子驚視又殺之徑領數卒屠其家人昇屍納井中賊登城昭勒衆於通衢接戰自暮達旦屍填街不可行昭躍馬從缺城出馬蹶墜斬賊驩曰得朱將軍矣生致之昭瞑目仗劍無一敢前旋

中矢死年四十六

宋史本傳

种師中字端儒

世衡孫長安人

歷知邠州慶陽府金人內侵師中援中山河

間黏罕至太原師中抵壽陽之石坑爲金人所襲兵潰獨以麾下死戰身被四創力疾鬪死師中老成持重爲時名將諸軍自是氣

奪其聞命即行奮不顧身雖古忠臣不過也詔贈少師諡莊愍

宋史

本傳

楊綯

邦基父華州人

宋末爲易州州佐宗望伐宋蔡靖以燕山降易州即日

來附綯被殺

金史楊邦基傳

吳革字義夫華州華陰人好學喜談兵以秉義郎幹辦經畧司公事

金人南牧使粘罕軍見之庭揖不拜責其貪利敗約詞直氣勁粘

罕少屈爲追回威勝諸屯兵授書使歸欽宗問割地與不割地利

害對曰金人有吞噬之意願悉起關中士馬赴都爲備詔以爲閣

門宣贊舍人持節諭陝西行至朱仙聞金人犯京師復還與張叔

夜同入城請於帝乞幸秦州又乞出城劫之使不敢近又乞諸門

同出兵牽制衝突尾襲應援可一戰而勝時衆言已入皆不果後

金人攻安上門填道度壕革言之守將使洩蔡河水以灌之不果

及城道將合欲用前議則水已涸矣車駕幸金營革以爲墮其計
往請叔夜欲身見其大酋計事叔夜問其故曰茲行有三說一則
天子還內二則金騎歸國三則革死叔夜爲言之不報上皇妃后
太子出郊革白孫傳乞留之不得乃與傳謀於啓聖僧院置賑濟
局募士民就食一日之間至萬計陰以軍法部勒久之所合已至
數萬多兩河驍悍之士既而有立張邦昌之議革謀先誅范瓊輩
以三月八日起兵謀既定前期三日有班直甲士數百人排闥入
言邦昌以七日受冊請亟起事革乃披甲上馬至咸豐門四面皆
瓊黨給革入即執之脅以從逆革罵之極口引頸受刃顏色不變
其麾下百人皆死

宋史
本傳

劉化源耀州人紹聖元年進士建炎初金人陷關陝守令以城降者
金人因而命之化源時知隴州不肯降城陷被執金人使人守之

不得死遂驅入河北驚蔬果隱民間者十年終不屈有米璞者與
化源同鄉里登政和二年進士第時通判原州劉豫欲官之杜門
謝病卒不汙偽命有劉長孺者亦耀州人時簽事博州判官廳公
事與豫書備陳祖宗德澤勸以轉禍為福豫怒囚之百日長孺終
不屈豫後復官之不從紹興九年宣諭使周聿上之朝詔赴行在
簽書樞密院事樓炤言璞苦風痺化源長孺老病遂命各轉兩宮
奉祠又言新鳳翔教授陰暉守節不仕詔特改令入宮其後金復
渝盟長孺之華陰縣不屈而死

宋史本傳

張吉

宗顏父
延安人

為涇原將解宣威城圍死之

宋史張
宗顏傳

李好義下邳人祖師忠州團練使父定一興州中軍統制好義弱冠
從軍善騎射為興州正將吳曦受金人說以蜀叛亟歸與其兄對
哭謀誅之密結親衛軍黃術趙亮吳政等女弟夫楊君玉亦與知

長史安丙與楊巨源陰結忠義欲圖曦好義遂遣君王報丙丙
曰非統制李定一之子乎此人來斷曦臂矣約二月晦舉事好義
夜享士麾衆受甲與好古好仁及子姓拜決於家廟衆皆踴躍時
僞宮門洞開好義大呼而入曦露頂徒跣開寢戶欲遁遂斫其首
出僞宮亟馳告丙城中市不改肆好義請乘時取關外四州王喜
忌其能沮之好義曰西和乃腹心之地願得馬步千人死士二百
齎十日糧可濟丙從其請好義率衆攻城親犯矢石人人樂死以
少擊衆前無留敵金西和節度使完顏欽奔遁好義整衆而入欲
乘勝徑取秦隴宣撫令謹守故疆不得侵越士氣皆沮好義以中

統制知西和州卒諡曰忠壯

宋史本傳

張珏字君玉鳳州人以戰功累官中軍都統制號虓將寶祐末大兵
圍合州珏與王堅協力守之景定初堅入朝以馬千代四年乃以

代千珏魁雄有謀善用兵出奇設伏莫無遺策其治合州士卒
必練器械必精御部曲有法故人人用命咸淳三年四月平章賽
典赤提兵出合州城下珏碇舟斷江中爲水城大兵數萬攻之不
克遂引去德祐元年陞四川制置副使知重慶府二年十二月珏
入重慶至元十五年二月珏率兵出戰兵大潰歸索鵠飲左右匿
鵠乃以小舟載妻子東走涪中道大憾斧其舟欲自沉舟人奪斧
擲江中珏踴躍欲赴水家人挽持不得死明日鐵木兒追及於涪
執送京師珏至安西趙老庵解弓絃自經廁中

宋史本傳

金

楊達夫字晉卿耀州三原人泰和三年進士會有詔徙民東入關達
夫與衆行及韶避兵於州北之橫嶺爲遊騎所執將褫衣害之達
夫挺然直立馬首畧無所懼稍侵辱之即大言曰我金國臣子

爲汝所執不過一死忍裸袒以贖天日耶遂見殺

金史本傳

完顏陳和尚名彝字良佐豐州人父乞哥同知階州軍事戰歿於嘉陵江陳和尚試補護衛轉忠孝軍提控正大五年北兵入大昌原合達問誰可爲前鋒者陳和尚擐甲上馬不反顧是日以四百騎破八千衆奏功第一授定遠大將軍六年有衛州之勝八年有倒回谷之勝九年三峯山之敗走釣州城破陳和尚趨避隱處殺掠稍定乃出自言曰我金國大將欲見白事詣行帳前曰我忠孝軍總領陳和尚也我死亂軍中人謂我負國家今日明白死天下必有知我者時欲其降斫足脛折不爲屈割口吻至耳嗅血而呼至死不絕大將酌以馬湏祝曰好男子他日再生當令我得之時年

四十一

金史本傳

劉興哥楊沃衍部將率兵往來邠隴間屢戰屢勝故大軍猝不能東

下興哥鳳翔號縣人起於群盜人呼曰熱劉後於清化戰死大兵至酌酒以吊西州耆老語之至為泣下

金史本傳

董成夫奉元人以軍功授察罕腦兒宣慰使敵兵入邊歿於王事贈中大夫樞密院副使謚忠烈

賈志

明

王真成寧人洪武中以功授燕山右護衛百戶從靖難出奇制勝肥河之戰斬獲無算而後隊不繼被圍數匝真氣愈奮斬敵數十人馬上自刃而斃

續文獻通考

高翔朝邑人洪武中以明經徵為監察御史所論奏皆國家機要多被采納建文時尤戮力戎事相與激發忠義初翔與程濟並徵翔勵名節濟好術數翔止濟勿為此不聽已而有兵事濟又勸翔學

其術翔曰我願爲忠臣也金川門破翔招濟同死濟曰我願爲智士文皇素聞翔名即位後召之翔持喪服入見大哭語不遜乃命殺之沒產夷族諸給高氏產者皆加稅曰令世世罵翔也親戚悉戍邊又發其先墓雜犬馬骨焚灰揚之而以其地爲漏澤園

世法錄

韓永陝西西安人或曰浮山人豐軀美髯音吐宏朗官戶科給事中

慷慨論兵建文喜之靖難後杜門不出召入見不屈死

續藏書

趙義商州人洪武中進士任中軍都督府經歷死於靖難親族爲盡

今其地名爲趙峪

賈志

程濟朝邑人以明經爲岳池教諭去家數千里濟夜歸朝邑朝講岳池人咸異之建文初熒惑守心濟上言明年某月某日兵當從西北方起帝曰安得此不祥語將誅之濟請囚而觀之明年燕果起兵帝出濟獄中以爲翰林院編修使充軍師護軍小河之戰南軍

大捷諸將樹碑露功誇列姓名濟固辭不得夜自礮碑下鐫之及靈壁之戰南軍大敗成祖過軍碑下大怒命鐫滅之遽使止曰錄其姓名來乃如碑按治濟名獨以先鐫脫及金川門破濟自髡從建文君亡屢免之於阬其後建文君出滇濟嘗從行已莫知其所

終名山藏

趙天泰三原人建文元年以明經爲翰林編修出亡之日天泰與焉

時衣葛因自稱衣葛翁又號爲天肖子後老死於蜀

表忠紀

王志咸寧人永樂初進士授吏科給事中陞河南知府四年草寇猝

發死之勅旌忠臣

表忠紀

高士文咸陽人官燕山左護衛百戶從靖難有功累陞前軍都督僉

事爲人質直剛果善騎射其征交趾多効勞勦賊至廣源州沒

於陣人皆惜之

名山藏

路俊字文英富平人官錦衣衛百戶英宗北征俊扈從土木敗績任
潰圍而出號召軍將軍將莫應又擊虜營未至行在力竭遇害天

順間諡昭信子誠世襲錦衣衛百戶

富平志

王尚文商州人正統中舉進士授戶部主事土木之變沒於沙漠

賈志

霍瑄字大宗鳳翔人永樂中舉人授山西大同通判陞知府正統十
四年英宗土木之變守城者戒嚴不敢啓瑄感慨奮不顧身從水

竇匍匐出親叩馬鳴咽進膳羞靴袍

賈志

姜漢字大容榆林人由指揮歷總兵鎮寧夏正德五年寘鐸之變其

黨何錦周昂丁廣等謀置酒王宮伏兵召鎮巡官挾之使叛漢至
寘鐸以微言挑漢漢責以大義寘鐸知不可奪伏兵起執之漢罵
不絕口遂遇害事聞賜祭葬加子璽官指揮使後鎮甘州數立邊
功能世其家部將有李秦者綏德衛千戶於寧夏花馬池石溝堡

陝西通志 卷二十一
戰死

延安府志

殷輔西安前衛指揮僉事正德七年調征四川與賊廖麻子戰於德

陽死之時有遊擊姚震榆林人亦征蜀寇戰歿

賈志

馮禎綏德衛指揮歷榆林副總兵正德七年流賊猖獗禎奉命討之連戰皆捷及洛兵半渡賊悉衆薄之戰死事聞贈洛南伯建祠於

河南府

延綏鎮志

蔣賢榆林人以監生任靈壁縣主簿有清謹名時流賊犯鳳陽賢以

靈壁去皇陵不遠繕城隍修戰具選民丁以備之賊至賢禦之郭

外力不敵衆潰城遂陷賢短兵巷戰賊趣降賢曰榆林忠孝地我

有死而已遂爲亂兵所殺事聞賜祭奠於靈壁妻謝氏守節十數

年以饑死無嗣

延綏鎮志

西安後衛人正德中舉人任登州府通判流賊犯境璋率衆力

戰死之賈志

霍宗鄜州人正德十四年回賊作亂掠州境兵備道甯溥遣指揮率
戍卒及民兵捕之至石梯山賊勢猖獗衆潰走宗以鄉兵獨當一
面力不能支死於難鄜州志

張澍渭南監生正德末任江西按察使知事宸濠反械繫之驅令督
舟投水死渭南縣志

郭江榆林衛指揮歷固原總兵官戰於定邊死之賜葬祭建憫忠祠
蔭一子指揮世襲是時有綏德衛指揮孟仁中軍指揮賀節者以
力戰死於定邊又有龍州把總延安任傑者臨陣見殺延綏鎮志

張鳳榆林衛指揮大同弘寺堡叅將以罪謫戍嘉靖中總督翟鵬題
起廢官立功贖罪鳳赴焉戰於鵝鴿峪全軍覆歿詔復官建祠蔭
次子正千戶是時死事者又有把總宗俚臣戰歿於永興之頁沙

梁佖臣威武堡人又榆林衛指揮王璋延綏衛指揮僉事史畧指

孫世傑皆戰死於宣府

延綏
鎮志

天福延綏奇兵營軍也嘉靖二十四年隨副總兵李琦被圍於靖

邊指揮崔經力戰矢石如雨天福以身翼蔽經得免二十三年副總

兵李梅雙山之戰天福從管司賈琛先登軍敗琛與天福同戰死

延綏
鎮志

武城榆林人正德間武舉與千戶李江管本鎮司事嘉靖初禦敵於

紅山兒敵衆兵寡力戰而歿

延綏
鎮志

高儒綏德衛百戶嘉靖中隨遊擊梁震拒敵於棗茨梁死之又有宋

銳者榆林衛百戶嘉靖中隨副總兵白爵戰歿於高家堡之馬鞍

山

延綏
鎮志

王勲渭南人襲祖職爲延安衛百戶驍勇多智所向克捷歷陞寧夏

副總兵嘉靖中邊境不靖勲率師出戰於鹿泉敵大至勲據險發矢力戰移時矢盡而殞世宗錄其忠詔立祠子以寧襲指揮使

渭南志

孫贖綏德衛指揮爲薊鎮總兵嘉靖中勤王戰死傳楫傳潛子萬曆

中陣亡

延綏鎮志

馮恩榆林千戶歷官指揮僉事嘉靖中由延綏遊擊陞大同叅將前守將遇警多不出恩至力戰死之贈右軍都督府都督謚壯愍蔭子時泰指揮僉事世襲又千戶姬曉亦死於大同

延綏鎮志

杜松號鶴林榆林人少負胆決精騎射軍中目爲飛將萬曆間火落赤糾套騎吉能屢爲邊患松從總兵官麻貴爲前鋒屢破走之積功至坐營中軍二十三年領兵出常樂塞先登陷陣論功最進實授叅將繼敗火落赤於安定又敗鐵雷於磚井威名日起請告歸

松在軍與士卒同甘苦紀律甚嚴又驍果善戰松去邊四年督撫以邊事急交薦之詔起原官協守延綏東路炒忽擁衆寇孤山之紅崖堡松率精騎直前搏之斬其部長十二奪駝馬鎧仗無算進都督僉事掛征西將軍印專守延綏三十四年大敗火落赤於安邊塞吉能邀王封不得大舉寇邊又勾東西部入犯松分馳應禦諸部皆退走多棄其所掠人畜輜重去西陲倚爲保障復告歸四十六年

王師破撫順鐵嶺中外大震言官爭薦以原官起駐瀋陽破家募士及蒼頭廬兒得數千人疾馳出關四十七年春經畧楊鎬分四路出兵松一軍出南路經畧原期三月朔進兵松自負夙將先二日三鼓嚴裝出撫順

王師聞松先出亟簡精銳三萬騎悉力禦之松越五嶺渡渾河已半

渡忽萬騎遮擊軍衝爲二車營鎗炮在後水急不能即渡林間伏
四起自午至酉血戰力竭全師殲焉松碎首淪沒寸骨不存續表忠記
袁應泰鳳翔人由永平道陞遼撫適熊廷弼被論代爲經畧辛酉二
月

王師渡渾河臨遼城至三月二十三日城破經畧登樓拜疏佩印劍

自裁內姪姚居秀從之僕唐世明撫屍大慟焚樓而死

續表忠記

展涇陽舉人歷自在州知州轉餉出關駐瀋陽時日暈異常展移

牒經畧言天象示警宜預飭邊防踰月而瀋陽城破展死之

續表忠記

如文引字士昌華州人萬曆癸卯舉人謁選滕縣知縣莅任三日白

蓮賊攻滕縣時滕民什九從賊公徒步叫號登陴才數十人問民

何以從賊則曰禍由董二董二者延綏巡撫某子也公登城呼賊

曰若等以董二故挺而走險吾執董二治其罪以伸若冤若等復

爲良民可乎公長身赤面髭髯奮張乘墉大呼聲殷殷動樓櫓賊望見以爲神人謹呼羅拜俄而箭發於西隅二賊斃焉視之則延綏沙柳簪也賊憤盈肉薄而上遂不可禦公緋衣坐堂上嚼齒罵賊賊前搏公裂其冠裳以銀鐺鎖之公大罵胡不速殺我越三日爲詩八章書於屋壁以印狀授門役魏顯炤家僮守務北向再拜自縊而死遂葬於官署之池側賊考掠顯炤索印顯炤及守務罵賊死之詔拜錄顯炤守務復其家

錢謙益撰墓志

楊愈懋潼關衛人萬曆末爲中軍都督天啓癸亥蜀奢寇亂命愈懋總鎮四川獲捷功者五急欲進掃其巢遂率師至江門候援兵不至愈懋曰事不可爲矣乃以勅印齎巡撫望闕遙拜曰此戰犂庭社稷之福苟或失利以死從之決計深入竟遇害妾王氏聞訃絕

死潼關志○按奢崇明亂蜀是天啟中事愈懋盡節必在此時潼關志作余酋當是奢余音近相訛耳

牛彩南鄭人以明經為成都教授多士奉為師表為奢賊所執不屈

被殺

漢中府志

鄭國昌字天符邠州人萬曆丁未進士任永平兵備道己巳

王師下永平有勸出亡者國昌厲叱之先令妻子縊死乃從容自盡

事聞追贈太僕寺卿從祀表忠祠

畿輔通志

子奉先以蔭歷衡州府同

知亦殉難

邠州志

党還醇字子真三原人天啓乙丑進士為良鄉令有聲己巳城破死

之妾勝友僕死者一十二人事聞贈光祿寺丞

賈志

高運馨神木人崇禎初王嘉引倡亂運馨被掠拷索財帛因極罵投

河死時賊入貢生蘇萬元室萬元瞪目罵不已賊怒斫之又有秦

光祖李亨俱涇陽人仗義討賊俱力竭而死

賈志

薛永譽吳堡人歲貢崇禎三年賊大起七月犯吳堡之川口永譽先

奉母居城中身率衆守虎頭二寨攻圍既久永譽知力不支盡趣寨中老弱渡河永譽自斷後以禦賊賊衆蝟集矢石如雨遂入河

中死又安定王俊彥字升庸素重氣節寇陷城閤室自縊

賈志

秦三輔字陸海萬曆戊午舉人令新城值吳橋兵變直攻新城三輔率衆守陴身被七創而死

三原縣志

方振寰字斗華城固人崇禎丁卯舉人任山東福山知縣城破死之

賈志

梁體坤字寧宇臨潼人增廣生崇禎五年流賊縱掠其地令牽馬坤

大罵曰我朝廷士子豈爲賊驅使耶賊舉刃斷其四肢遂殺之

臨潼志

志

楊呈秀字實甫華陰人登萬曆庚戌進士歷官順慶知府後罷官家居會流寇侵掠慨然結鄉勇以爲保固得數千人每戰獲捷崇禎

七年賊衆大至迎戰於縣西二十里不勝或勸之退避叱曰丈夫受國恩臨難當致死豈可縮首苟生遂奮呼當先力竭被執賊怒甚遂磔殺之直指傅永淳以聞贈光祿寺少卿賜祭葬弟呈芳字泗源性篤孝友兄呈秀禦賊被執呈芳泣曰兄亡弟豈獨存遂單騎直入賊營橫戰至暮身帶重傷猶斬賊數十人及項將斷呼兄之聲不絕直指并以聞建坊旌表

華陰志

張應昌字順之榆林人初爲延綏副總兵崇禎四年正月賊神一元陷保安應昌擊敗之三月賊圍慶陽應昌援之賊解去降賊不沾泥擁衆脇糧賞攻米脂洪承疇與應昌往討賊分兩營以待連戰賊始遁至西川斬三百餘級賊溺死無筭六月鄜州賊混天猴張孟金謀襲靖邊應昌邀之於真水川敗之追斬四百餘級神一元死弟一魁領其衆降尋叛去其黨黃友才斬之來歸既而友才復

叛至是爲應昌所誅以功陞寧武總兵官加都督同知紫金梁諸賊破臨縣山西震動六年二月許鼎臣曹文詔屯平定應昌屯汾州往來太原以禦寇七月賊攻彰德應昌進勦賊汾陽九月敗賊於平山獲賊首張有義卽一盞燈也七年四月川賊三萬屯鄖陽之黃龍灘應昌與戰於均州敗績死之

延安府志

張景耀字振分盩厔生時流氛四煽景耀以禦寇保鄉閭自任知縣田時暢令主義兵訓練嚴肅崇禎七年七月賊鑽天鵝等循山而至景耀遏之西境乘勝追至謝家灘會天大雨衆潰爲賊所獲支解之又同邑諸生雷一聲里民翟羽翽與叔翟三皆率鄉兵禦賊衆潰而死

盩厔志

黎屏極鳳縣武生崇禎七年流寇破城屏極挺身巷戰自辰至午以

刀折見殺

漢中府志

薛國蕙華州人以寧夏守備家居弟國華郡諸生崇禎七年八月流
寇千人盤踞西南石曉山峪肆行屠掠國蕙及國華欲奮身搏戰
苦無兵適御史傅永淳入關抵華阻寇聞其事呼至面諭勸賊遇
賊於峪口之柿村同義勇姬文啓羅國楨史曰環王紹禹馬任等
十八人喋血大戰俱陷陣而歿賊死甚衆即夕遁

賈志

徐應龍應鰲華州人應龍爲山東鄒縣典史應鰲爲四川雅州吏目
崇禎七年流寇劫掠俱被虜不屈死時同郡諸生范祖淹壽官徐

邦瑞皆罵賊死

華州志

韓識武功人儒生崇禎甲戌守堡禦賊堡已陷猶持挺當門傷數賊
賊壯之不欲殺識大罵不已竟磔死

賈志

王祚丕字念茲涇陽人崇禎甲戌流寇入境祚丕奮率鄉勇戰於王
六十橋手刃數賊爲流矢所中而歿

涇陽志

屈學曾鳳翔縣諸生崇禎中流寇大起當事檄屬邑各練鄉勇爲守
禦計學曾身承其事八年春賊趨鳳翔學曾督衆力戰陷陣死
陽志

張全昌字潤之應昌弟以父蔭歷官靈州叅將崇禎四年延安賊趙
四兒以萬餘人掠韓城郃陽全昌以五百人戰三日斬三百餘級
賊走鄜州復擊斬六百餘級趙四兒尋降陞宣府總兵官七年二
月河南賊自鄖陽渡河入郢陷房縣全昌連敗之七月賊混世王
等從鳳翔東奔將犯西安洪承疇檄諸路兵合擊又恐賊東出潼
關先令曹變蛟同全昌間道走渭華遏其前而自率兵至潼關紅
鄉溝追賊賊卻承疇馳赴藍田欲從山後間道勦之賊夜走商洛
八年五月全昌自成陽出興平之東距老回回營五十里賊渡河
走郿縣官兵追至秦王嶺值寇大至全昌擊敗之自是商洛之寇

逃終南山中餘寇西奔與平遂祈降陰遣諸賊連營走潼關守將
艾萬年等兵潰全昌亦沒於陣子福壽武舉任宣府深井堡守備
亦以勇力聞

賈志

王廷賓字觀光澄城人崇禎戊辰進士任鄆陵令調永城以治行卓
異與考選旋丁艱歸里八年秋賊混天星破城被執不屈而死

澄城志

梁民養韓城諸生崇禎八年寇至民養攜家入砦自保寇攻急度不
能全泣跪母衛氏前母自裁呼妻女至手刃之三子皆遣去遂自
經死

韓城志

張國禎字蓋翼臨潼人從兄給諫國祥講實踐之學一夕賊數十劫
其父國禎即持梃赴之免父於厄人稱其孝崇禎乙亥流賊薄城
率族人避去夜添雨雪曰不可獨全吾家於是率僕人遍至隣家

令亟起避難黎明賊突至率衆禦之手刃數賊相持至未力疲被

執不屈遂遇害

賈志

杜必殿字賓皇世居咸陽北杜鎮崇禎乙亥賊薄邑必殿倡義堅守

援兵不至城遂陷被執賊有渠魁奇其貌露刃逼降必殿不屈指

賊罵曰若獨非朝廷赤子何竟反耶賊怒甚遂遇害

鶴雪堂集

俞翀霄靖邊人任延綏總兵崇禎九年闖賊擁兵北至時翀霄蒞任

甫月餘倉卒率兵五千拒之於西川土壑砦遇賊力戰自辰至酉

殺獲甚衆援兵不至遂死焉

延綏志

鄭國禎延長人以選貢授歸德府通判尋告歸崇禎十年六月流寇

陷城子諸生鳴世欲奉之逃國禎曰城亡吾安所逃乎遂自刎死

鳴世見父死義不與賊俱生奮刀出門殺賊力盡被執賊過天星

壯其貌欲釋之鳴世仰天大呼曰父死吾何生爲罵不絕口賊

之同邑張程恩貢生授南陽府經歷終養家居城陷以大義諭賊

賊怒殺之

賈志

苟好善字若誠醴泉人天啓乙丑進士歷長治蘭陽令有惠政擢御史建言忤旨出知濟南府戊寅

王師南下好善分守北城城陷死之贈太僕寺卿子鶴齡字子和聞父死徒跣走數千里遍覓遺骸出於壕下始扶櫬歸葬時兵火倉皇幼弟延齡壽齡俱相失鶴齡間關求訪復得完聚蓋孝友兼至云同時又有莊平令黃建極文安令王鑰俱武功人武邑令鄭集命延長人鉅鹿令郭司南安塞人任邱令白元慧清澗人皆城破力竭而死白妻某氏郭僕張爾璋同死焉

賈志

劉光祚字鴻基榆林人積功至保定提督三關總兵以河南賊盛督師楊嗣昌調援勦過南陽唐藩留守郡城值李自成兵數十萬來

攻光祚血戰七晝夜力盡而歿

延安府志

劉國能之守葉也力戰不能支城陷自成念國能幼同里習嬉戲稍

長同學拳武又同起草澤有意欲生之乃好語國能曰若我故人

也何不服國能唾而罵曰我初與若同反今則王臣也奈何從賊

遂遇害

續表忠記

豫撫常道立招撫射塌天等射塌天本名劉國能性

至孝就撫乃奉其母命也庚辰六月左良玉遣國能圍張獻忠於瑪

瑙山獻忠食盡分兵四出抄糧不得糧歸者盡殺之未歸者詣降

左良玉使國能將之首行詐稱糧至獻忠開營延入國能掃其營

壘擒其妻孥與徐以顯潘獨鰲等送襄陽獄自成破葉縣國能守

葉自刎死其妻先死子方八歲自成入城抱置膝上欲收養之不

從自解所帶小刀亦刎死

明季遺聞。按續表忠記國能附汪喬年傳盡節在十四年明季遺聞作庚辰

年事

不合

武大烈臨潼舉人強敏有幹濟時令永寧寇掠境上數却之至是

囚勾賊來攻城守都司宵遁大烈固守三日賊夜半登城執大烈

自成以同鄉故欲活之大烈不屈索印又不予乃燔灼以死

續表忠記

盛以恒潼關衛人崇禎十年冬來知商城縣事雖儒者而秦人素習

金革甫蒞任寇猝來犯以恒登陴設守以兵法部勒邑中子弟賊

攻城不能克乃解去嗣後不復來犯邑賴以安及獻忠陷襄陽勢

益張以恒已遷開封府同知士民以其前此禦寇有方畧城得無

陷群起攀留以恒因士民歸誠於已遂慨然任城守事十四年二

月賊大隊雲集以恒堵禦甚力雨雪大作守陴者寒凍不能支以

恒猶環甲執弓督家衆射賊賊益併力合攻流矢中以恒右額猶

裹創拒敵賊留餘黨綴以恒而別揀驍悍緣北城而登遂陷以恒

率家衆巷戰良久殲賊甚多家衆亦盡於賊乃被縛大罵不屈爲

賊所支解其孫覺亦不屈死事聞贈副使

續表忠記

葛竹溪淳化諸生善射崇禎十四年流寇滿天星過縣恣行剽掠竹溪不勝忿急挽弓挾矢而往射賊殺十餘騎須臾矢盡弦絕賊衆大至遂遇害於寺坡崖下

柴菴疏集

猛如虎虎大威俱邊外人家榆林如虎歷總兵官鎮守南陽屢却賊及圍城將陷持短兵巷戰手及袍袖有血數升過唐府北門叩頭謝自稱力竭爲賊所殺大威爲楊文岳大將鎮守汝寧攻土賊中礮而死

延綏鎮志

李賢中部歲貢任汝寧教諭以老歸崇禎十四年寇陷中部執賢登加笞辱賢張目大罵延頸向賊賊竟殺之子諸生芬字慟父死

白當道得祀鄉賢

賈志

艾毓初字孩如米脂人崇禎辛未進士知內鄉縣毓初生

兵習戰六年冬流賊來犯毓初令埋大砲滾地龍於城外城內暗通火線故於埋砲處備禦單疎示賊以瑕賊果爭馳之燃線而炮發賊死無筭乃解去歷陞至叅議分守南陽自成用宋獻策計復來犯楊文岳援軍至即引退甫退又復嘯聚使援者疲於奔命城遂潰毓初登城樓自縊

續表忠記

杜邦舉富平人任鄆陵典史崇禎十四年十二月城破被執自成知其素得民心欲降之罵曰朝廷臣子豈爲賊用自成怒抉其舌邦舉喫血噴之仍大罵遂遇害

續表忠記

馬嗣休字孟善同州人官戶部主事管薊鎮糧儲壬午年死難母薛氏弟嗣杰與焉又嗣休從兄嗣煜官濟南府通判城破亦以身殉

賈志

党威字振玉神木人以西安叅將有戰功見重於經畧丁啓睿崇禎

十五年督師汪喬年統兵二十萬勦闖賊威以中軍副將進秩總

兵同四總兵十副將當闖賊八十萬衆環戰十七陣互爲勝負及

賊勢日衆汪督駐襄縣爲戰守之計威與曹文詔以萬餘兵護汪

督據孤城城中乏食威見勢不可支乃進謀督師曰不如暫退關

中休養一年簡勁兵以殄渠魁餘黨不足平也汪不可及賊圍城

下汪知事去欲自盡威泣勸乃止旋登城見賊帥旗在南威引精

銳二十騎出西門直抵賊帳適賊帥他逸斬左右數人奪帥旗而

還次日復率千餘騎出東入南出西入北衝突賊營當者無不披

靡及城陷汪自經威復馳驟數創失馬自刎而死不仆者移時賊

帥爲具棺函瘞之賈志是時副總兵樊來保及神木副總兵艾萬年

與李賊戰于巴家寨死之延綏鎮志

吉孔嘉洋縣舉人累擢順德知府壬午

王師臨城孔嘉力屈與妻張氏長子貢生惠迪次子婦王氏並死焉

續表
忠記

李盛英榆林人以明經任太湖縣流賊構難圍城盛英竭力拒守援

絕城陷被執賊欲降之盛英不從罵賊撞樹而死其妻亦完節

賈志

劉其德字子上興安州人寄籍紫陽崇禎戊辰進士由庶常歷官諭

德在史館有聲尋目盲乞骸歸僑寓襄陽闖賊破襄陽其德罵賊

而死

興安州志○按省志云其德歸守興安興安志云死於襄陽中間事蹟不無抵牾存疑可也

馬颺字電如陝西同官貢士崇禎十五年任沔陽州同知賊陷承天

督兵堵賊賊繞出颺背颺馳介馬疾呼所向披靡賊至愈衆下馬

奮呼家丁數人背城與賊戰猶射殺數十賊矢盡力竭被執不屈

賊怒用勁挺通中而死藁葬城東二十一載子來沔啓殯易棺顏

色如生

湖廣志

李振聲米脂人進士巡按湖廣王璣扶風人舉人承天知府崇禎壬午除夕賊破承天並以不屈遇害振聲被執自成以同姓同邑稱之爲兄且贈以金幣振聲不屈賊數置酒邀飲醉即厲詞詆斥乃移之襄陽令部將劉體仁伺察之及孫傳庭出關討賊復移之裕州有言振聲通書傳庭者賊怒遣其將谷永毅之南門外時九月二十九日也先是振聲被執有傳其降賊者朝野共詆之後賊入山西榜列受職者姓名以誑遠近振聲與焉實未受職也

續表璣忠記

字玉溫知承天府時築關守城勤事如家既報陞鳳陽副使忽流寇大至攻城璣極力禦之降兵內潰璣憤甚執刃轉戰被執罵不絕口賊百計脅降不從怒令殺之璣望闕再拜延頸受刃時崇禎癸未正月也楚人義之收屍殯殮子鍼鎬扶喪歸葬

賈志

孫璜字用謙三原人由歲薦任鹽山教諭癸未鹽山城將陷左右

璜與令同出走璜曰臨難苟免何以爲臣已而城破璜自縊

三原志

范如游邵陽人崇禎癸酉舉人性明敏有執持後知武定州死於難

邵陽志

邵公坤廩生公吳公佐監生公齊公量生員俱商州人群從聚居夙敦友愛閨門雍睦無間言癸未七月商城陷賊將袁宗第巡遊至邵氏逼降之公坤兄弟五人同聲罵賊不少屈脅以刃罵益厲賊盡殺之公坤之胞姪紹祖徽祖遵祖緒祖嗣祖公佐子昭祖公量子光祖弘祖式祖爭衛父兄難長者制挺幼者投瓦礫俱遇害賊入中閫公坤之寡嫂公乾妻張氏痛五子無一存赴井死公佐妻孔氏公吳妻劉氏俱投繯死公坤之胞妹適雒南薛匡倫歸省其兄最後遇賊賊俾執爨氏厲聲罵賊賊愈怒礫裂之邵氏一門男婦死難共一十八人亂定合塋安葬一時稱奇節云

賈志

張任字碧岑三水人萬曆間舉人歷官衡州守未幾寇至任率衆督戰舟中力屈死之舉家咸盡節焉

賈志

劉裡字誠若中部人舉人性剛介識大節事父極孝賊陷邑城裡負父走時秋雨河漲渡者多溺裡獨弗溺辛巳授登封知縣時大盜李際遇申靖邦盤據山砦裡設法守禦與士卒同甘苦練死士數百且戰且守賊不敢近癸未逆闖攻登封城陷被執自成欲降之裡掉鬚罵曰豈有七世清白吏而降賊耶自成從容言曰吾與公誼切桑梓今方有事關中當同載西歸裡神色愈厲曰吾願血沾登土自成義之次日復令賊將劉崇文說之反覆數百言終不屈遂遇害於泮水之側事聞贈按察司僉事先是登封不守父爾完泣曰吾子素剛烈死國事矣及聞訃顧坦然曰殺身成仁又何惜

焉

賈志

趙希魁渭南人由武進士官叅將從孫傳庭戰歿於河南

渭南志

盛昶之字璽振潼關衛指揮使總制孫傳庭與寇自成戰郟縣敗績自成乘勝抵關勢若山裂人無固志城遂陷昶獨堅立不動日暮被擄明日賊促諸將西強昶之行不從厲聲罵曰我固盛指揮也世受國厚恩有死而已恨不手刃諸賊奴豈有職官從賊者哉賊怒縊殺之又衛指揮使張爾猷字定遠潼關陷率家僮奮馬馳突遇賊南門矢發輒應手仆復揮刀斬其數騎賊相顧失色俄頃賊大至環攻之矢下如雨爾猷大呼曰我前掌印指揮張爾猷也賊爭前刺之身被數十創既墜馬猶罵不絕聲而死時本衛指揮使李繼祖守東城本衛千戶袁化龍守西城賊入各就所守汎地死之

賈志

郭宗振字引震華州人萬曆癸卯舉人初授河陽令河陽地當衝道

官商絡繹供億維艱宗振至力革之調太邱時有貴公子奪人田
逼婦自刎宗振竟置以法境多盜宗振懸金以購盜賊遂息轉壽
春守境內奸宄作亂者聞宗振至悉散去郡北多水患民皆逃亡
宗振捐俸招集歸者六十餘家人名之曰郭公集郡地多荒磧宗
振給牛種寬賦稅漸次開墾遂成良田丁內艱補右丞遷比部郎
檢驗吏牘謹敬罔懈有言官陳贖軍之奏宗振抗疏立爭朝論是之
丙子啣命恤蜀有納賄縱賊並開釋重案者宗振悉寘於理後旋
里崇禎癸未殉難

華州志

陳嗣虞字述敬華陰人萬曆庚子舉人仕至高郵知州性沉靜廉潔
一介不苟歸里後杜門讀書不妄交遊闖賊陷省僞檄依例輸餉
嗣虞內懷悲憤而不形於色棄家人不意步至渭濱投水而死

賈志

東肇商字雲駒華州人諸生性敏而多學詩文千言立就聞賊至人

皆逃避肇商獨飲酒不輟挺刃而出大罵賊奴遂被害

賈志

焦源清號湛一由進士歷官至宣府巡撫年七十始舉一子賊入西
安勒源清往見不屈自經弟源溥號涵一以進士由知縣入爲御
史歷撫大同未一年罷歸癸未冬闖賊入西安召諸邑儒紳受僞
職源溥爲賊黨所劫執見自成授以總督銜源溥大罵曰爾爲賊
乃欲污我自成閉諸空室罵益烈鬚髯皆上指皆裂賊稍近舉
手擊之復厲罵不輟賊拔其舌支解之同死者渭南吏部尚書南
企仲號弦蒲進士起家年八十三矣罵賊不屈曰老臣何惜此餘
年報國不食死子進士禮部郎居業不屈死從子居益由進士歷
官至福建巡撫海外有紅毛夷者俗殷富國名賀蘭自昔不通中
土奸民潘秀賈大泥始引其人據澎湖求市遂入犯內地濱海大
擾及居益履任設方畧討平之天啓五年遷督河道晉工部侍郎

時逆奄竊柄奄黨迎合逆意劾居益依傍門戶削籍去福建士民詣闕留之不聽乃立祠以祀豎碑於彭湖平遠諸山紀其績焉崇禎元年起督倉場時陝西四鎮缺餉至三十餘月貧卒蠶起爲盜居益爲鄉土憂疏請以陝賦當輸關門者留三十萬紓其急報可代張鳳翔爲工部尚書以疏救曹郎帝怒其徇私再削籍後叙守城功乃復冠帶城破自成誘降不屈罵賊被炮烙而死

續表忠記

鄭君愛字錫吾渭南人選貢授鄖陽府推官以憂歸復補衡州府皆有聲事父極孝值李自成陷渭南堅持大節不應僞命遂不食死

渭南志

王佩珂臨潼人事親色養備至明末司鐸河南商邱歸里後值李賊肆橫預戒子孫潔身蹈義勿致玷污癸未冬賊入關中堅臥不起水米不入口旬餘而卒其子及孫賊迫脅以僞官皆遵訓守義不

爲賊屈臨潼志

白昭遠字允哲臨潼監生崇禎癸未闖賊圍堡堡破昭遠大呼城頭
曰城破矣節義爲重婦女各宜入井一時婦女死節者甚衆賊怒
殺之臨潼志

陶爾德字太初咸寧人進士仕至川北道告歸李賊攻長安爾德分
守東城賊至被刃死咸寧志

崔爾達字汝明西安右衛指揮擢秦州守備秦藩稔其賢疏留之癸
未逆闖圍會城爾達擐甲侍衛昕夕不懈城陷衛士皆竄爾達獨
以短兵接戰賊衆大集爾達奮呼殺賊手刃數人賊怒環攻之遂
死五日得屍顏色如生咸寧志

李光信咸寧學生崇禎癸未賊圍城光信晝夜守禦城已陷猶持斧
與賊戰賊怒以刀斫其頸死又諸生王召俊亦投井死賈志

朱誼眾秦藩宗室也字明遠丙子鄉薦聞變投井死秦府舍人不知

姓名王被執舍人牽賊而罵遂死亦袁憲一流也

學古堂集

徐應魁秦藩右護衛旗官王愛其才敏每奏事京師取辦江南皆特任之應魁忠摯自矢癸未城陷應魁從王嗣及王嗣為賊所刼應魁絕粒七日而死

賈志

祝萬齡長安人少受學於馮恭定歷官至副使賊陷省會萬齡衣冠入關中書院拜先師畢自縊於側御史霍達表聞於朝蒙詔褒異

學古

堂集

竇光儀長安貢生任懷慶府通判崇禎末歸里闖逆陷會城光儀衣

冠東向拜遂赴井死又徐方敬者萬曆時舉於鄉授儀封知縣既

歸里值會城破不欲辱賊手遂正衣冠赴井死

賈志

孫孕芳字嗣香世居西女之咸寧與兄孕泰讀書慈恩以節義為已

任壬午孕芳舉於鄉孕泰拔貢士賊入城孕芳自經孕泰尋父不

學古堂集

周培忠咸寧人以興平縣貢生任隰州知州謝政歸會李賊陷西安

一門盡節者數十人又咸寧朱恩同弟斗環姪浯俱義不從賊投

井死

賈志

邱從周都司吏也長不滿三尺彊直敢言西安陷見自成暴虐乘醉

直至其前戟手罵曰若一貧賤細民今妄踞王府將僭偽號逆天

背理所爲如此吾見汝屍之萬段也自成大怒立砍殺之

續表忠記。按

賈志作

邱東周

雷堂商州廩生崇禎十六年十月十五日李自成陷商州謂家人曰

我自有死所乃衣冠出至博文齋自經死李本健亦廩生城破逃

北山被執慮不得死所給賊曰我有藏金盍至家比至急投入井

賊誘使出乃大罵以石擊之罵愈甚賊以土石填其井又庠生李本深城破服衰麻與子合娃守父柩而哭賊至並子俱被殺庠生呂元聲城破與母妻誓同死母妻曰汝盍逃乎元聲堅不去死之又生員孔纘又城破被賊執大罵不止賊煎油灌之立死賊退收其屍油尚透腹又楊名道役也被賊掠罵不絕口乃縛置樹上罵益厲割其舌磔之州民周揚實工烏鎗賊攻城三晝夜揚實傷賊甚衆賊識之城破執而磔之焚其骸

商州志

李喬崑字厚高陵人天啓乙丑進士筮仕洪洞洪洞故多李氏喬崑之遠祖在焉有持家譜干以私者謝卻之擢守真定中官欲加以屬禮杜門不屈人稱其節闖寇據關汚以僞司馬拒弗受望關北拜而死

賈志

王徵號葵心涇陽人由進士除廣平推官白蓮獄起株連者數千人

徵咸理出之濬清河水閘溉田至千頃母憂去補任揚州三王之國護從者多所誅求徵白王禁戢民以無擾天啓中徽州富民吳養春與弟養澤爭產弟赴東廠首其兄佔黃山獲利無算閹提養春拷問又遣主事呂好問追贓變產激變徽民事連巨室數百人下徵按問徵據法爭之所全活者甚衆各省建祠媚忠賢揚州祠成大吏咸往叩首賀徵竟不往父憂服闋陞僉事歸里後流寇大起徵創爲連弩活橋自行車自飛礮以資捍禦癸未闖賊入關羅致搢紳徵已先期自題墓石曰了一道人之墓又書全忠全孝四大字授其子永春曰吾且死死豈爲名欲汝識我心耳賊果遣使趣徵往見引佩刀自誓乃繫永春去徵遂絕粒越七日而卒里人謚曰端節徵素爲德於鄉當永春被繫時鄉人不避賊鋒請以身代者數百人賊乃舍之永春竟得不死

續表
忠記

牛象爚字汝華涇陽諸生賊至其家爚踞樓不肯下賊舉火焚樓以逼之爚蹈火死又涇陽民趙九筵家居堡中賊至衆皆懼九筵鼓勇扞禦賊登陴九筵拒之中矢死

賈志

常道立字修之三原人萬曆間進士仕至河南中丞政績著聞歸里值李賊入秦不屈北望神京稽首哀呼不食而死

賈志

喬巍字維嶽三原人幼從馮少墟溫無知遊踐履篤實待異母弟極友愛居繼母喪哀毀骨立登萬曆己未進士授司農郎司餉山海關陞叅政出巡川南時奢安二寇叛巍削平之以事左遷僉事後論平奢功陞副使尋擢山西叅政分守冀寧道便道過里值逆闖陷省徵索不少屈與表弟王伯達僕人王崇德同日被戮時並稱

之

賈志

志養和字祥人盤屋人萬曆戊子舉人爲屏山令火焚獄獄中囚

於外火熄囚復歸獄人奇之擢刑曹持平不阿出守南安防澗賊修水城擢滇南憲副有疾歸里癸未逆寇自成力徵之時年八十

二不屈絕粒而死

賈志

竇汝器字擢五富平人幼穎悟長尚節義以歲薦授城固司訓宗禎癸未冬李闖入關諸郡風靡汝器說邑令增陴濟隍簡練丁壯戮力拒守及攬槍雲集衆皆潰散汝器度勢危歸整冠帶望闕拜畢坐明倫堂以待寇入賊殺縣令并執汝器脅以白刃欲降之汝器大罵不屈遂遇害於泮池側

賈志

牛養傑岐山人事後母能孝由選貢知延津縣坐剛直免歸闖逆之變衣冠向闕北拜罵賊死又同時南鄭舉人席增光諸生葉旋皆

不屈死

賈志

張鳳翽字健翀城固人天啓乙丑進士官江西巡撫歸遭闖逆陷城

爲賊所執脅之仕抗志不從遇害

賈志

岳中衡城固貢生崇禎末賊至岳中執呵之跪不屈令斬之中衡曰

我得死所矣復釋之誘以官中衡曰我已成貢士猶不屈自爲汝

賊官邪遂爲亂刃所斃

賈志

劉長庚同州生員慷慨有志節明崇禎末李自成蹂躪秦關長庚挺

身誓衆固守城圍繼聞會城陷遊騎且薄州衆皆奔散長庚仰天

嘆曰是草莽臣委命之秋也先謁孔子廟焚衣冠次邀族黨於家

指割城內地建祠祀先餘備蒸嘗衆謂士無死法隱遁可以潔身

可以全義長庚決志不從顧其妻曰吾乏嗣納妾幸生二子宗祧

可繼善撫之死後葬我於讀書樓下又顧謂妾雷氏爾將奈何雷

慨然言願相從於地下長庚拜謝引至書樓曰此吾平生脩習之

所天地鬼神共鑒在茲遂手刃其妾并六歲女徐自經死一時觀

者如堵莫不垂泣

賈志

解光纓字端甫韓城人性端謹師事韓令左懋第以名節相勉會賊難避地晉中日結義士圖刺賊晉撫行視軍光纓往說謂長安雖陷三邊宿重兵兵將中豈遂無顏其卿郭子儀其人者願以忠義檄三邊令會勦未果賊攬摺神金匿之者多波及光纓挺身往見賊不少屈繫長安掠以刑備極苦楚終不屈賊壯之適有為賊策餌衣冠收人心者檄令受職光纓不應辭氣益烈賊不能平遂遇

害

賈志

魏國柱字鳳庭蒲城人萬曆壬子舉人幼即孝親敬兄不事浮飾宗族稱之初令臨淮清慎自矢愛民如子陞睢州守益勵清真尋罷歸值賊亂被執遇害子諸生允貺事父母極孝父為賊執追餉允貺定省不離側卒以身殉又童僕羅安隨侍國柱朝夕痛哭同時

被害人咸義之

賈志

王淑景耀州人中丞國長子廕知府性穎敏學行與三水文翔鳳齊名廕職未任值闖逆陷關中偽守欲用堅不爲屈與子生員肇祥

同遇害

賈志

趙士達永壽人歲貢任莊浪衛教授流寇破城被執罵賊遇害又同里貢生張應泰亦被執不屈而死

賈志

齊大成鄜州諸生崇禎癸未李自成陷長安大成哭於家已復別妻

子獨衣冠入文廟不食問之輒詬罵越十日而死

延安府志

尤世威榆林人官總兵有戰功崇禎十六年李自成陷長安十月傳檄榆林是時巡撫甫罷代者未至人心恟恟時世威家居榆林道都任以衆議推世威爲大將無何賊衆十萬下延安克綏德遣人說降衆未發議衆將劉廷傑大呼曰賊雖破長安然三邊尚屬朝

廷中州子弟不習戰榆林天下勁兵一戰必奪其氣然後約寧夏

固原爲三師以遞進賊可破也衆曰將軍議是於是都任令於軍

中曰壯士壹聽尤將軍令世威廼簡兵誓師守具未備賊臨城下

出戰敗之賊復悉衆薄城攻戰七晝夜不下賊穿城納火炮穴中

城崩世威率衆巷戰兩日夜婦女登屋上亦彎弓助戰都任死之

世威與弟世祿劉廷傑王世欽王世官李昌齡被執檻車送長安

自成坐堂上世威等不跪自成曰將軍皆名將佐朕共取封侯可

乎世威等仰天大笑罵曰驛中小卒敢大言某等朝廷上將悔不

速殺汝自成笑前解縛世欽唾曰唉驛卒勿近前污將軍衣自成

怒命皆斬之榆林之陷婦女死義者數十人城中井滿

賈志

王世欽榆林人山海總兵免官家居崇禎十六年李自成陷長安榆

林守將王定棄城走世欽與尤世祿等部署諸軍守榆林城以拒

自成城既陷被執檻車送長安自成親釋其縛罵不絕口自成殺之世欽方械繫道宿長安傳舍中且歌且飲大醉顧謂驛使自今至長安幾日驛使以對仰天大笑曰行矣丈夫死當爲厲鬼以殺賊聞者壯之

賈志

世欽弟洪官天津總兵以勞卒於軍

延綏鎮志

王學書字忠吾榆林人父保字麟岡鎮守昌平及寧武薊鎮遼東總兵有戰功歿於海州學書補世職歷遷宣府總兵官尋轉天津防海總兵以老致仕林居值闖逆攻榆學書念巖疆重地世受國恩散家資給兵民拒賊七日城陷被掠罵不絕口遇害子國鼎字新甫官浙江寧波道以勞瘁卒官

延綏鎮志

鍾茂先榆林人爲綏德衛管屯指揮賊至督衆固守及賊勢熾茂先知力不支藏二匕首於左右蔽膝中賊入茂先家陽以酒勞之左手捧觴右手拔匕首刺賊賊負傷出走茂先入殺其妻子而自刎

焉延綏鎮志

黃世魁榆林千戶從總督守薊門適歸值賊圍城悉力固守攻益急城陷歸家陳衣冠取祖宗承襲號紙置香案東向而拜曰臣力盡矣更著深衣從容縊死妻柳氏亦殉焉延綏鎮志

黃廷政廷用廷弼俱黃演孫也演榆林衛指揮歷官廷綏協守出兵芹河陣亡蔭廷政襲指揮使廷用千戶廷弼百戶李賊薄城廷政兄弟念家世忠烈力戰抗賊廷政中炮而隕廷用廷弼益自憤勵城陷遂偕死焉延綏鎮志

尤世祿字裕齋榆林人以世職起家歷任固原遼東宣府總兵子拱極字樞震任山海總兵家居寇至守新添門賊從海潮寺穴城入世祿覺之募敢死士縋城擊賊南門陷父子見執死之同時死者有原任宣府總兵王世國山海副將楊明山海叅將尤岱岱子捷

官薊鎮總兵甲申京城陷率兵奔河南志圖興復為叛兵所殺舊志

潘國俊漢中衛百戶官榆林副將逆闖破城死之漢中府志

張雲鶚字元舉榆林人舉人為戶部主事督餉山海關致仕歸賊至

城守不屈死之子發字啓之定邊副將先雲鶚戰死延綏鎮志

馬應舉榆林人為撫標中軍賊薄城應舉曰孤城不可守也乞師於

套以數千騎至西門眾寡不敵套人引去賊入被擒梟於市延綏鎮志

潘雲騰漢中人官延綏叅將賊陷城與兄國奇俱死之賈志

李淮榆林人原任西安叅將值賊李過入城淮先令妻子自縊率子

出門殺賊父子皆自刎死延綏鎮志

陳義昌榆林學生性耿直闖逆陷城義昌獨正色罵賊為賊所殺諸

生以罵賊死者又有沈濬沈演白拱極白含章延綏鎮志

張連元榆林學生城陷偕弟連捷入漢壽亭侯廟從容縊於梁間又

諸生李可柱縊死於余肅敏祠胡一魁李引祥亦自經於家

延綏鎮志

梁文炳及弟文燭俱靖邊諸生崇禎末流寇破城欲招致幕下皆抗

節不屈而死

延綏鎮志

熊維藩字振宇威武堡人宣府叅將致仕歸高賊攻堡維藩力戰傷

賊甚衆堡陷維藩自刎

延綏鎮志

台元延安衛人闖賊入城兩手握大石欲爲狙擊計隣人恐禍及縛

之至家不食五日死

延綏鎮志

劉廷傑字若三彞鼎子崇禎癸未爲延綏撫標叅將寇逼榆林堅志
固守城陷被執罵賊不屈賊支解之事聞贈都督僉事其從弟廷

夔亦投雲巖閣死焉

賈志

馬鳴節榆林人世襲百戶賦性忠勇闖兵攻城將陷鳴節將妻孥用
木器廂櫃圍聚一處引柴燃火烈焰薰天鳴節持刀巷戰砍死賊

兵數十力竭身跳入火焰中弟鳴廉任總督汪喬年中軍勦賊於

郊縣被圍單騎馳救出入賊營者三殺死賊兵無筭力竭而死

賈志

楊繡徵膚施人生員崇禎十六年闖逆破延安繡徵衣冠至公署縊

死衣冠內題云所恨上有老母未葬下有幼子未成眼觀時勢斷

無苟生之理云云聞者哀之

賈志

惠顯清澗人由步卒積功至延綏副將闖賊至激勵將士勉以忠義

閉城固守城破被擒賊慰之曰若固世家子而有武畧能從我則

以權將軍相授顯極口言之磔於市從子漸時爲撫邊守備亦罵

賊死

延安志

赫崇德綏德州人生員聞僞官入城即具衣冠自縊於文廟爲門斗

救免掖至學宮觸柱而死又鳳翔一生面詰賊官鞏煇煇爲之痛

哭賊聞之決杖而死又賊至三原下學令生員講書一生出曰孔

孟之書教子孝教臣忠諸公相率從賊講忠孝乎講不忠不孝乎
牛鞏諸賊無以對撤席而起惜未得兩生姓名云

學古堂集

張禮字義亭威武堡人爲鹽商素有行義賊至傾家貲守城城陷被

賊執罵賊而死

延安府志

李樹聲岐山人知猗氏縣廉靜不擾有德及人丁內艱不復仕闖逆

徵之使仕樹聲曰吾家六世受國恩今安往乎即夕呼天而逝

賈志

羅世濟字虛舟平利人萬曆己酉舉人官沔池教諭素負大義剛正

不阿闖賊亂起即毅然以死自誓既而沔池失陷力戰被執不屈

死之子得鴻練兵守平利殺賊甚多城破與妻子俱死焉

賈志

郭天吉榆林人武進士仕至甘肅西協副將賊攻甘涼城陷天吉巷

戰被擒不屈賊怒磔之

賈志

衛景瑗字仲玉韓城人天啓進士授河南推官以廉明擢御史兵部

尚書楊嗣昌議加剿賊兵餉景瑗抗疏拒之訖不能用會給事中
傅朝佑李如燦以劾閣臣溫體仁得辜下詔獄景瑗請釋兩臣以
作敢言之氣帝大怒降行人司正屢遷至大理少卿以右僉都御
史巡撫大同崇禎十七年李自成東犯太原景瑗議調兵趨控鴈
門總兵不肯行寧武陷賊遂長驅抵大同總兵出降景瑗猶督麾
下巷戰賊大至士皆散走衆擁景瑗入自成營或叱之跪景瑗不
爲動踞坐於地大呼皇帝而哭自成好謂曰吾非有天命不至此
君佐我我當益加君官景瑗瞋目曰吾期滅汝朝食肯從汝作逆
耶自成見景瑗言切急命掖之出越三日再擁見自成自成又好
謂曰君忠臣吾將具車騎放君還家景瑗曰國破何家可歸盍速
殺我因出不意以頭搶階石血淋漓被面絕而復蘇自成又命掖
之出復三日驅景瑗行至海會寺北向再拜自成死有繼母及兩

子從行賊亦不之殺也

賈志

石可礪字用汝城固人萬曆乙卯舉人知寶豐縣時縣舉人牛金星居鄉肆惡又納族妹爲妾被告可礪奉審執法無徇金星懼逃投闖逆及陷西安金星欲復舊怨遣人搜獲可礪囚禁挾餉備受酷毒可礪不屈仍指數前事殺於紅芝驛

賈志

劉必達山陽人崇禎庚辰廷試特用授山西汾陽知縣有聲及闖逆抵汾仗義不降投井中賊兵尾至自井引出縛繫太原陰通書信於京口賊怒殺之

賈志

左士元耀州監生御史永圖子闖賊破州拘士元至省勅銀助餉士元曰我乃清白吏子孫安有此即有肯齎賊乎賊怒欲殺之見其年少有才欲脅降士元不屈遂遇害

賈志

宋師襄耀州人萬曆丙辰進士仕順天府尹家居闖賊入關師襄不

屈被虜而東孫金臺邑諸生知師襄必不免伏劒尾行至聞喜師

襄盡節金臺亦從死祖忠孫孝士林重之

賈志

李遇知字伸伯洋縣人萬曆庚戌進士授東明令持廉秉公特召考

選補兵科給事疏月凡十上理餉徵兵有裨樞政丁母憂補官正

崔魏煬蔽舉國如狂之日遇知先官樞垣有疏薦鄒元標馮從吾

等南近都魏璫嗾其同類中公以薦舉匪類獻媚東林矯旨削籍

崇禎初起禮科累陞戶尚總督倉場時不苦寇即苦旱防盜打運

不遺餘力擢吏部尚書時時勢日危遇知以文文山正氣歌作呈

觀而泣焉都城陷自縊於紅廟賊解縊執之劉閔宗宋企郊等亦

之仕遇知不屈遂遇害一門同死者七人遇知妻先歿妾王氏

遇知縊死

劉如漢李公紀略

李遇知字仁徵咸寧人天啓辛酉舉人爲河南靈寶學諭月課諸生

以忠孝大義勸率之至流寇侵城聚諸生於明倫堂曰平日所講忠孝大義安在誰無父母誰無妻子誰不履王土而可偷生乎每一生令監百姓十人倡義堅守賊始退陞山西猗氏知縣令各村社立鄉約以敦風化親詣四鄉力田者賞荒蕪者責時旱災頻仍兼以黃鼠害稼地多管草蕪地萬頃竭誠祈禱霖雨時降令構訟有罪者罰捕黃鼠若干或罰鋤管草若干不半載悉爲良田流寇煽突軍需不繼當道有議加糧者昌齡爲民請命繪圖告減文移十數反始獲免尋以失當道意謫河南布政司檢校未幾遷知沈邱就道會永城劉超叛鳳陽督師檄取監軍即親赴軍前冒矢石獲叛告捷而監軍之日賊潰沈邱當道卸罪誣下刑部獄數月神京陷逆闖釋獄內諸搢紳令就選昌齡堅臥不食其子泣勸之正色曰余生平所學所講者何事余爲國家罪人當死余不爲國家

罪人尤當死余志決矣越五日而卒

賈志

高鏗榆林人爲北京神機營叅將李自成犯闕鏗闔門自焚死先是鏗族父從龍任固原叅將崇禎中調征流寇從龍行至三水遇賊力戰而歿諡忠勇

延安府志

劉彰本保安人貢士赴銓授涇陽訓導未出都城闖逆入京彰本囑其子雙全曰受朝廷一命之榮身屬朝廷矣今國破君亡吾不苟生兒歸幸勿以我爲念遂縊於涇陽會館

賈志

蕭偲字慎甫延安人如薰子襲錦衣指揮逆闖犯京師偲年二十三

殉難

賈志

郝允曜字覺天清澗人以祖蔭補南國學典簿歷刑部郎中多所平

反以清獄忤旨謫上林簿尋復戶部主事逆闖至不屈死

賈志

李固本字伯立洋縣人崇禎丁卯舉人歷官定州僉事闖逆入定死

之
賈志

張光斗字元圃神木人貢士天資穎異嘗遊馮少墟先生門筮仕南皮令豁荒恤殘優禮師儒擢天津監紀復調河間同知闖兵陷城欲大用抗節不屈罵賊而死其妻單氏亦與難合郡憐其忠祀名

宦
賈志

李承燦華州人山海關義院口守備加遊擊崇禎末城破死之又同里有濟縣尉李華貴新城主簿王者佐郊城典史李嘉賓皆城破

不屈而死
華州志

馮登鰲膚施人以舉人知靈壽賊陷城不屈死之其叔父大緯訓蠡

城亦罵賊死
賈志

石隆字長卿三原人少好騎射尤善古文詞癸未聯捷憤時政擬上書為權貴所遏賊入秦曲沃李建泰督師公慨然請纓願復三邊

自黃甫川渡河聯絡榆中靈夏曲沃不能從遂憤鬱成疾避地江南甲申五月聞北都陷痛哭數日不語不食三日死湖口友人劉

湘客經紀其喪

學古堂集

王被徵張少保士佩家僮也幼從少保事主極忠順闖賊陷京師被徵哭詣少保墳曰奴從主人食朝廷之澤久矣今主人之主已晏駕奴何以生爲不食數日死

韓城志

衛楨固字屏君韓城人少負奇氣喜談兵手畫山川形勢習戰陣攻守之法崇禎甲戌成進士授開封府推官是時流寇往來村民扶攜奔走多及於難公議脩築西關城處之經南陽汝寧河南諸城皆量其地宜城者勸諭增築論守城事宜十三條撫按奇公才有警必檄與謀公受檄即戎服據鞍按視城壘所過扼塞險易悉識之十四年九月以卓異召對中左門言平寇爲足國第一

其對擢拜雲南道御史明年受命巡按真定等處時河南民有遭
寇竄河上者楨固竭家貲以賑檄緣河州縣安輯活數十萬人甲
申正月闖逆陷河東諸郡大學士李建泰請禦之命楨固監其軍
三月京城陷誓殉國難楨固按畿南嘗疏救叅將王燝燝以兵二
百隨征至是行至大石橋遇賊數萬騎督燝兵殊死戰賊引却已
復益兵來戰官軍盡覆楨固突圍出走追騎至躍入井中水涸不
得死爲賊所執抗罵不屈賊相牛金星故中州舉人嘆公理汴時
發其惡幽公於獄中會自成西奔楨固乃得脫入五臺山之西北
峪爲絕命辭遂自殺

河濱
全書

劉之勃字安劉寶雞人崇禎七年進士由行人擢御史風采清峻尤
長於奏議時帝因寇亂頗崇信二氏之勃疏言近傳營殿閣設齋
醮臣竊以兵荒交迫流移載道省土木齋醮之費以養饑民固萬

年根本之圖也以佐軍需亦一時騰飽之資也若費之無用之地豈不重可惜耶疏出時論韙之繼上節財六議謂國初馬以萬計草場止五六處今爲額漸少而草場反增二倍可節者一水衡工役之費歲幾百萬請察可以停緩之工盡助軍興可節者二諸鎮兵馬潰敗時聞而餉額不減當嚴察隱冒可節者三光祿宴享賜賚既從儉約而監局官役額設如故日廩月餼不貲可節者四三吳與澤潞之織造以及香蠟藥材陶器之屬無歲不貢積之在內則爲廢物輸之自下皆是金錢可節者五監軍贊畫之官不可數計平時則以一人而糜千百人之餉臨敵又以千百人而衛一人之身不惟耗食兼且耗兵可節者六優旨議行十五年正月疏叅諸督撫之溺職者二月請停東廠言京師之五城及巡按御史俱有察訪之責刑部定罪大理平反此定例也今緝訪既屬東廠刑

部且爲承行之吏大理更屬贅員不便於官守者一律法越訴有
禁一詞告二事不准非兩造俱陳不定罪今四方奸頑以所隸有
司難售其奸悉赴廠投首道路遠隔數千姓名半多假捏一紙連
株全家立破不便於民生者一從來尊卑相制四維乃張今緝訪
所獲或以子弟訐父兄或以僕隸訐家主或以部民訐官府不便
於國體者一帝即命飭行未幾命之勃巡按四川甲申年八月賊
逼成都初九日賊遂入城蜀王率宮眷投井死之勃被執賊以之
勃同鄉欲強以官之勃勸以不殺百姓改邪從正輔立蜀世子賊
不從遂大罵求死賊酷苦之終不少屈臨死語賊曰寧多割吾肉
無濫殺百姓縛於蜀府端禮門外攢矢射殺之

續表
忠記

文郁邑諸生

院吏石璞殞之西門外

鳳翔府志

張繼孟字伯功文質之曾孫也萬曆己未進士知濰縣擢御史奉命
巡江極陳江防八要以堅執不立魏璫生祠削籍逆黨敗詔補山
東道御史直言糾劾出知廣西府宣慰普名聲與交趾倡亂勢甚
猖獗繼孟單騎至息宰河招降之滇人懷其德立祠尸祝稍遷兩
浙鹽運使加叅政因忤權璫崔璘左遷保寧知府歷川西道崇禎
甲申獻賊陷成都不屈死之妻賈氏同遇害

賈志

王勵精蒲城人崇慶知州初由選貢生授廣西府通判仁恕善折獄
歲饑毀所繫銀帶以賑及聞成都陷士民驚竄其僕勸之去不可
曰身受國恩焉所逃死賊勢逼具朝服北向拜闕西向拜辭其家
從容書於壁曰爲臣盡忠爲子盡孝而今而後庶幾無愧書畢登
樓縛利刃於柱而露其鋒貯火藥於樓下危坐以待及報賊騎
江勵精身自舉火火烈觸刃貫胸而死

表忠記

張耀字融我三原人萬曆癸卯舉人嘗從學於溫恭毅之門篤志力行
事親至孝仕至貴州布政使值流寇張獻忠檄至耀率僚屬登
陴拒守誓同一死城破耀率僕役猶格殺數賊遂被執賊逼耀
耀大聲罵曰狂賊不知天命逞目前耳我天朝臣子豈從乎今
日惟一死耳賊怒遂縛耀耀怒罵如初於是磔殺耀眷屬一十三
口同時俱被害

賈志

衛引文字祥趾韓城人崇禎辛未進士授庶吉士歷編修司業中允
諭德環堵蕭然時家口近百同居五世無間言流寇四起海內瘡
痍引文方在里癸未十月逆闖入關全省瓦解即星夜赴京極陳
利害時賊勢猖獗在朝猶未敢言而引文以詞臣越俎言且將以
家財輸國上以其愷切召見引文痛哭陳勦賊之計請召四大鎮
翼衛王室已而神京陷遂之江南以憂憤死

賈志

王總衡字振乾咸寧人由廕生仕熹宗朝不附魏璫因失朝儀例止
罰俸竟以革處西歸侍奉兩親備極色養璫敗寃白以親老弗仕
及闖賊入秦授以官不受賊怒加刑掠體無完膚罵不絕口賊以
爲死置之踰日復甦避居終南山

賈志

按忠節列傳俱以殉節之先後爲編次其有事蹟畧具而歲月
未詳者則統列於後如宋西安朱友恭爲涇原將以兵敗不屈
死明西安費邑宰以寧羌州叅將戰死鄜縣諸生靳之翰以罵
賊死鄠縣吳大猷全調鼎張奇英王福劉學鑑王良志劉慎俱
以殺賊死涇陽貢生趙友梧以守堡陷賊死延安衛人張維忠
以寧夏總兵戰敗自經死延安衛世職指揮岳茂以大同總兵
戰死延安衛世職百戶邵復初以平遼將軍戰死膚施人孫中
嗣以階州廣文守城死安塞貢生袁光先以滎陽訓導城破

刎死麟遊諸生劉心潔罵賊死隴州貢生郝珊以訓導守節死

漢中衛世職指揮胡汝寧以四川守備征氏戰死漢中舉人王
彥芹以新城知縣抗節死褒城舉人歐植以長葛教諭罵賊觸
柱死洋縣崔榮宗以蒙陰尉罵賊死鳳縣原任天津叅政辛思
齊以家居罵賊死寧羌衛人張錦以寧夏百戶征蜀寇死榆林
衛世職指揮崔世榮丁碧俱以平羅衛叅將戰死榆林衛人吳
國偉以副將戰死商州諸生趙吉士以殺賊死雒南貢生張丕
式以三河訓導抗節死韓城舉人趙春芳以許州學正罵賊死
潼關衛武進士王乾以遼陽守備戰死乾州舉人陳虞裔以南
皮知縣抗節死三水貢生秦廷輔以濟南府通判遇變死綏德
衛指揮李芳以固原遊擊戰死綏德衛世職指揮鄭東以分守
蘭州戰死綏德衛指揮沈應麒戰死綏德人張興以總旗戰死

葭州李養成以口外守備殉難死高家堡人王琮琮子賜福以神木把總戰死神木人張拱微以三屯營副將戰死神木貢生張正名以汝州州判殉節死閔其姓氏迄今猶凜凜有生氣也

本朝

田佳運長安人貢生居壘中以耕讀自適順治二年賀逆犯省城破其堡獲之罵賊死仲子陌亦投井死

安尼恭鄆縣人生員賦性質直順治二年流寇賀琛破城尼恭被執不屈仍大罵琛怒甚寸磔以徇至死罵不絕口遠近哀之時寇孽未靖劫掠四出以諸生不屈者鄆縣王圻被殺苑華州趙文明自剄死又華州民郭汝寧字君泰亦罵賊死

許國楠咸陽人順治三年隨征入閩漳泉既下奉檄攝漳浦令時戎馬在郊徵輸百出國楠處之裕如未幾楊學臯變起率眾

城城陷國楠義不辱身赴井死

吳錦興安庠生順治三年流寇餘孽陷州城鯨與州人譚達文並罵賊不屈死

李增廣鳳翔武生順治四年土寇李啓陽據麟遊清涼寺嘯聚數千人侵掠村堡道府團練鄉勇爲守禦計知增廣多勇畧俾督其衆及破賊乘勝逐北馬蹶被執不屈死之妻王氏年甫二十家貧苦守教二子俱入泮夫義妻貞聞於遠邇年六十一卒

白旗郿縣人由歲貢除蘭州訓導順治五年米狇子寇蘭州城陷罵賊殉難事

聞贈國子監學錄

賜祭一壇

周基昌城固貢生順治元年英王西畧從大兵至延安二年招撫

興漢暨四川保寧諸處有功三年賀珍寇漢中基昌單騎潰圍
赴省請救家人悉遇害賊平授直隸保定通判七年大兵下川
南調基昌從征八年以功授叙州府知府甫半載劉文秀自滇
窺蜀城陷不屈死妻王氏守節撫孤歷五十四年年七十有二
卒子志道孫元侯皆遊庠

倪光友定邊人任福建連江副將順治九年與海寇戰歿於陣

孫一鵬字圖南富平人起家

生中武科累功至叅將順治初遷

廣東水師副總兵十年冬

進水師總兵官十一年李定國寇廣

東之新會一鵬以舟師守

江門值陳奇策從海上突至一鵬率

兵大戰衆寡不敵遂歿

陣事

聞贈太子太保

賜祭葬仍月給俸米以恤其家

陳有虞字嗣韶富平人順治

進士授仙遊令十一年十二月

朔海寇陷漳泉欲乘虛犯命

城有虞曰吾城僅斗大然興福藩

籬也乃集士民議固守先是

成功屢經招撫益肆淫掠有虞

至任募鄉勇二百人又得家

十五人俾爲長復擇鄉勇一人

爲百總使將之賊至輒獲士

咸倚爲重至是賊百道來攻志

在必克有虞晝夜登陴與士卒

臥起士卒日累創泣戰賊屢

敗次年正月朔賊大進復敗賊

甚即城下掘地道實以火藥

名地雷初五日方旦地雷大作

地盡裂城頽守兵大潰有虞

率餘兵巷戰至日中轉戰至城西

一蹶遂中箭死從死者家丁

趙啓遜等十四人皆西北勁卒也

常夏適以省覲入閩中途

聞變事

聞贈福建按察司僉事

予祭葬常夏以蔭官戶部郎中

張占鰲洛川人順治二年拔貢生性至孝父病禱於神願以身代
任湖廣荊州府通判有治劇才康熙元年大兵進剿流賊餘孽
占鰲督運糧餉晝夜催趲至房縣之七連坪猝遇賊被執罵賊
不屈死之

特贈按察司僉事

賜祭葬子超以蔭生令宜陽

劉本善字太素高陵人順治辛卯武舉任湖廣守備康熙元年冬
山寇竊發制府徵兵會勦本善帥兵三百以往屢捷明年秋本
善渡河迎寇遂戰歿七年錄前功加

恩賜祭

劉偁三水人少有大志由行伍積功至總兵順治丁六年歸

雲南義勇前營總兵官康熙三年從吳三桂出師征水西備每戰輒奮戈先登賊潰走偶單騎追之陷大澤中爲賊兵環射而死事

聞給祭葬如制

李化龍字躍禹榆林人康熙三年以從征黔蜀功進遊擊駐防建寧縣時寇孽不靖兵民疑貳化龍多方綏輯四境安之會江右賊入盤湖隘化龍即出兵擊賊賊夜遁化龍追至嚴塘及之疾提兵走賊後奮騎獨出擊其中堅賊衆皆披靡俄爲烏銳所中而斃士民立祠祀焉

馬璟武功人由副榜貢生令永嘉屢著惠政康熙十三年耿逆蠢動溫郡戒嚴璟與副使陳丹赤協謀防禦一日集文武僚屬議城守事逆弁祖弘勲出不意殺丹赤倡衆從逆璟不屈瞋目大

罵死之逆黨進逼縣署姪穎姿僕張義保俱格鬪死事

聞贈浙江布政司叅政

予祭葬如制穎姿義保並蒙優恤子逸姿以蔭官蘇松糧道會

聖祖南巡面陳父瑛殉難狀且請諡奉

旨賜諡忠勤

姚開先字堯門淳化拔貢生由臨縣令補四川鹽井經歷吳逆叛
逆黨入蜀開先不屈自縊死子謙被掠後冒險扶觀歸里事母
王氏曲盡子道苦志力學中癸酉鄉試早卒父忠子孝一時重
之

張案蒲城人順治辛卯舉人康熙十三年任綦江知縣吳逆竊據
全蜀案矢志不屈以憤死

邵廷儀咸寧人順治甲午舉於鄉授清澗教諭尋陞靖遠衛教諭

值王輔臣兵叛偽檄促各官盡改舊印廷義獨懷印不予以死
自誓賊怒之勿責也事平以節義聞於

朝擢香山令有善政

王弘毅行五居淳化白堡村務農膂力絕人人呼爲狼王五康熙
十三年王輔臣叛五月賊至村縱掠衆竄弘毅力敵被擒賊喜
其勇陷以偽劄立碎之瞋目罵不已遂遇害

李毓采清澗人康熙十四年朱龍叛逆緣邊城堡皆奔潰毓采以
把總率兵逆戰於綏德苑之賊乘勝陷神木營守備張光斗苑
之又次陷木瓜營守備左成庫死之光斗成庫皆榆林人也

常日暄三原人康熙十四年滇逆方熾慶陽土寇作亂犯涇原攻
馮家堡三晝夜將陷日暄同魏良佐蔣四等率鄉兵一十八人
往援殺賊數十賊撤圍并全營衝殺日暄力戰鞭死渠魁并賊

黨數人衆寡不敵十八人俱戰死馮堡獲全

董正第五小根俱三水人甲寅王輔臣叛平慶間日無寧宇邑令林逢堯招集鄉勇爲守禦計二人與焉乙卯三月寇猝至據其城鄉勇分門殺入賊大敗走二人竟戰死

周士英榆林人由行伍授順德鎮標左營守備陞遊擊逆鎮劉進忠作亂士英統兵堵截至黃岡力戰死康熙十七年贈廕如制文天爵安塞人由將材授廣東左翼鎮標遊擊康熙十五年賊孫楷宗來誘叛天爵叱之遂被殺沉屍於海十九年贈卹有加韓璽聖淳化人幼喜韜畧順治二年以行伍從征屢立戰功授千總擢鄖陽守備康熙十七年擢勦竹房至岔山與賊血戰力盡被擒時吳逆陷衡州賊械以往逼降之不屈死贈署遊擊事傅汝友清澗人康熙十九年六月定海將軍王之鼎出師救永寧

汝友以總兵官隨征九月城陷被執至貴陽遂遇害事

聞贈都督同知子弘經廕衛千總大兵復貴州偏沅巡撫韓士琦收汝友遺骸殯於旅次三十年弘經始扶柩歸葬時同歿者總兵何成德劉奎陝西人王永世榆林人贈廕如汝友例

王伏金咸寧人任涼州鎮屬西把截堡守備雍正元年十月隨征西寧陣亡

張先志長安人康熙戊子武解元授七里關守備雍正二年勦卓子等山土番先志獨當加爾多寺一面因道險不得入率兵十五人進覘賊壘適林中番衆突出先志奮勇衝擊矢盡力竭遇害屍無完膚雍正三年奉

旨贈加一級

賜祭葬廕一子以衛千總用

徐宗仁長安人康熙六十年由行伍授陝西督標右營把總雍正元年九月從大兵出西寧十月羅卜藏丹津寇鎮海堡又寇新城宗仁先登陷陣前後得首功甚夥十一月勦郭莽寺二年正月勦爾各隆寺二月勦西海俱有功尋以獻俘引

見賜銀幣授千總累擢山西殺虎口副將七年四月奉

旨赴陝從征八年大軍進駐巴里坤宗仁統涼州兵分駐峩崦磯十

二月初四日賊大至宗仁飛符請援而身督兵拒戰三晝夜殺賊數千獲馬數百匹會各汛同時告警因出兵禦之十八日至卜羅磚井遇賊出戰奪回被掠人畜宗仁率師前進數遇賊轉戰不息二十二日至紅山硤賊悉兵來迎宗仁謂據山者勝遂駐軍以待頃之賊以攻急宗仁自辰至未血戰突圍爲火器傷脇而殞事

聞入祀忠勇祠給世職拜他拉布勒哈番先是宗仁同邑李國勲者
雍正元年九月由武舉同宗仁出西寧戰鎮海堡戰新城戰郭
莽寺俱有功引

見授甘肅南古城守備八年調巴里坤從征於紅山硤遇賊苦戰中
火器而斃時十二月初七日也

勅賜葬祭給世職拖沙喇哈番又督標中營千總王大謨蒲城人興
漢鎮標中營百總劉世勲興安人俱戰歿

恩卹有加

學習進士場釋名

